


# *EBÈLÙ, NSHAPÌTÀ*

## *MWITÂNÙ NÈ MWISAMBÒMBÒ* <sup>1</sup>

 . . . wa—wa Mukàndà wà Ebèlù. Pashiishe tubwelè mu wa 7, bwakwidi bwà Melekisedekè. Ne pashiishe, tubwelamù kuumukila ku bwakwidi bwà Melekisedekè, tubwela mu matùkù manènè a difuta dyà cibawu awu, ne ditàpulula, dyàbanya difuta dyà bibawu adi. Pashiishe tubwela mu nshapità munène wa diitabuuja, nshapità wa 11 awu; ne nshapità wa 12: “Kutèèka bujitu bwònsò ku luseke.” Ne nshapità wa 13: “Cisòmbedi cyà Cyendèlèlè cidì kaciyi ciibaka ne byanza byà muntu aci; ànu Nzambi, nkàâyendè, ngudi mwenze Cisòmbedi cinène eci.” Bilenga be!

<sup>2</sup> Ndi ne disànkà dyà kumòna mwanèètù wa bakàji udi paanyimà pààpa wàwa, udi ufùma ku dibwela mu disangisha emu awu. Ndi mbàmòna yèyè ne bàyendè. Makèèlèlà awu, tuvwa tuya mu njila, tupicila mu mwaba kampàndà wùvwà. . . Mémè mvwa ndyàmbidila ne mvwa mumanyè kaaba ne kaaba kònsò, bu mùmwà mukùbi wa nyama yà mwitu mùneemu mu Indiana, ne mwenzènze mudimu wà bukòntononyi bidimu byàbùngi. Mvwa mumanyè kaaba ne kaaba kònsò. Kàdi mvwa mufwànyine kujìmina makèèlèlà awu, kwìnè kùvwàbo aku, kumutù kwà tukùnà, cibeba cipyacìpà aci’s.

<sup>3</sup> Nènku inàbànzà awu ùvwa ne kànsèrè mu bisùlùsùlù, kàdi Mukalenge kwondopaYè mukàji awu ànu byà cyà bushùwà ebi. Twètù kwangata. . . Kaa, mùshindù mwinè wùdìci cilwè cyònsò, twètù’s tuvwa basòmbè mwab’awu. Mwanèètù Roberson, pàmwàpa ùdipù, leelù ewu. Nyewù mmòna mukàjèndè, ne Mwanèètù Wood, bôbò kaayi bàdipù. Nènku tuvwa kuntwaku mu mashingini a kale a cisemuna, mémè ne Mwanèètù Roberson, ne Mwanèètù Wood. Ki twètù kwangata mashingini awu, kubànda kuntwaku, kuulu kwà kakùnà aku. Ki kwòkù aku Mukalenge kuleejaYè kànsèrè aku bitòòke tòò. Ki díbà adi twètù kushààla biimàne mwab’awu tutàngila mùvwàku kènda kùùmuka pa mukàji awu. Ne ètù àbidì aa, biimàne tutàngila mùvwàku kènda kùùmuka pa mukàji awu. Ki kubìikilayè mukàj’a Mwanèètù Wood; ne yèyè ùvwa ùndondela, mùvwàye mutwile cintu cifiike menemene aci. S’ki yèyè ewu mu dindà emu, musòmbè lwà paanyimà pààpa mu èkèleeziyà emu, yèyè ne bàyendè wa ba-Kapinga, bàpicila mu cikondo cilenga mu Mukalenge. Yèyè kí ngwa ùkèmesha anyi?

<sup>4</sup> Ne ncìvwa mumanyè ne. . . Mùneemu, pa ciibidilu, bwà bantu bàà mu nyungulukilu emu, mmpùùkàpùùkà menemene

bwà bikèènà-kumòna kwenzekabì muneemu emu. Apa nkwanýi kumbèlu. Ne, ndi muswè kwamba ne, mu èkèleeziyà wanyì.

5 Mu dyàlumingu, dyà kùkaadi lumingu lujimà, tuvwa... Mbanganyì bàvwàku kaaba aka bamòne muntu uvwa mu dikalù dyà balèma awu? Mpofò, mucibùkile panshì, kàyì ùjaalama to, ne tujilijilu twà byeledi byà meeji tufwè, ne ba-Mayos bammwelè làà. Kàdi—kàdi mulundà wanyì kampànda mwena Kàtòlikè kumutùmàyè kaaba aka. Ne kumpàlà kwà mèmè kulwa mu disangisha, Mukalenge kuleeja Yè cìkèènà-kumòna cyà muntu awu. Aci nwènù bònsò nudi bamanyè. Ne mwaba awu muntu awu wàkondopiibwa, ku EMU MMÙDÌ MUKALENGE WÀMBA. Nwamònu anyi? Ki dìbà adi kujuukilayè kuulu, kupàtukayè wènda wènda, kwangatayè dikalù dyèndè dyà balèma adi, ùmòna ànu mùndì mèmè anyì nwènù mwà kumòna amu. Ne kupàtukayè mu citanda wènda ùpuusa dikalù dyèndè adi, ànu mùdì muntu yònsò ewu. Ki kajilujilu kajaalamiji... Nudi bamanyè's, kwèna mwa kwimanyinakù kuulu to, nwamònu's, kwèna ànu mwa kucyènza to. Nènku ùvwa ànu mùsòmbe bidimu ne bidimu.

6 Kàdi makèèlèlà awu pàngààyikù, inàbànzà awu ùvwa mwikàle ùlòòta mèmè mufikè, ànu pa dìbà ibìdì jaajaaja, ngamba ne yèyè ùvwa “ne kànsèrè,” ne pashìishe ne: “EMU MMÙDÌ MUKALENGE WÀMBA, ‘wòndòpìbù.’” Ki—ki kubìikayè, ne pàvwa mpa dìbà ibìdì jaajaaja. Ki Nyumà wa Mukalenge kutùulukaYè, ne mwaba awu cilòòtà civwàye mumòne aci—aci, ki Mukalenge kufilaYè dyumvwija's. Nènku kwondopiibwayè ànu pa cibànzà mwaba awu, anu mwaba awu mene twètù munkaci mwa kutàngila. Bilenga be!

7 Ncyèna mwà kuvùluka dìnà dyèndè to. Nganyì? Dyèbè nganyì, mwanèètù wa bakàji? Walton, Mwanèètù wa bakàji Walton, udi musòmbe paanyima pààpa wàwa. Udikù mwà kujuukila ànu kuulu cyànàànà anyì, Mwanèètù wa bakàji Walton? Ndi muswè kukukonkakù mùdì umvwa [Mwanèètù wa bakàji Walton ùdi wàmba ne: “Bilenga byà kacya.”—Muf.] Amen. Abi mbìmpè, bilenga bilayà. Yèyè mmwìmpè be, bwà kutùbènesha mu mùshindù awu. Pa nàнку tudi tutèkemena cipimu cinènè cyà Nzambi, byàbùngì, byà biyiila ne panshì.

8 Ngàngàbukà kampànda ùvwa mumusokòke cyòci eci. Wàkamwambila ne “ùvwa wèyeela ànu luseke lùmwe cyanàànà.” Civwàku civwa ne, kànsèrè aku kàkaavwa kayè bikolè kakakòse ne mweyelu wà luseke alu lwà cisùlùsùlù, nudi numòna's. Kwèna mwà kumwèna kànsèrè ku cyamù cyà mìdimà to, bwalu kànsèrè nkabùlù, kòkò kiinà, ne kàdi—kàdi mmwoyi. Ne wèwè udi—udi—udi ànu—udi—udi ànu utàngidila mu kànsèrè, ne cyamù cyà mìdimà aci. Kwèna ukàmòna to.

9 Nènku, kàdi Mukalenge ùdi cyà bushùwà... Tuvwa biimàne mwab'awu bakàtàngile, twètù biinè, ne etù àbìdì. Bakàtàngile ne

mùvwàku kàtentemuka, ne bakàmòne kùùmuka, ne ètù àbìdì. Pa nanku, tudì ne kusàkidila kwàbúngì bwà bwalu abu.

<sup>10</sup> Nènku mpindyewu, túsambidilaayikù mpindyewu, lumingu elu, patwikalà bayè apu. Ne pàmwàpa Mwanèètù Neville neàtungunukilè kubangila mwaba wùndì mushiile awu, bwà disangisha dyà mu diisàtù dilòlò. Mpindyewu kacìnùpici to, mu dilondangana edi dinènè dyà Mukàndà wà Bwàkabuulwibwà.

<sup>11</sup> Ndi mumanyè ne masambila àbúngì mmalàmbùdiibwe, ne tudì—tudì bamanyè ne Nzambi ùtu ùtèeleja masambila. Kàdi twètù, mu dindà emu, tudì baswè kulàmbulakù kaadisambila kakesè kumpalà kwà kubala Mukàndà. Mpindyewu, muntu kanà yònsò udi mumanyè ewu, ùdi mwa kubala Mukàndà *nùnkù*, anyi mwà kuwùbuulula *nùnkù* ewu. Kàdi bidi bikèngela Nzambi, nkààyendè, bwà kukàngula cyumwidi, bwalu Yèyè ng'Umwèpelè Udi mwà kucyènza.

Pa nàнку twinyikàayi mitù yètù bwà katanci kakesè cyanààna.

<sup>12</sup> Mpindyewu, Taatù, mu Dìna dyà Mwan'Èbè munanga, Mukalenge Yesu, tudì tulwa ne kutàmba kudipwekesha mpindyewu bwà kudifila, twètù bu basadidi Bèèbè, bwà Wamòna mwà kwakwila kutùdi. Tengùlaku mishikù yìdi yàkulà ne maci àdi àtèeleja, bwà Dìyi dyàmòna mwà kwakudiibwa kùdi Nzambi ne kutèelejiibwa kùdi Nyumà, mu bantu. Enzàku nàнку, Taatù. Swàku bwà Yèyè àngatè Dìyi dyà Nzambi ne àtwàbànyinè bilondèshile ànu mùtùdi tujinga, bwalu tudì tulòmba nùnkù mu Dìna Dyèndè ne bwà butùmbi Bwèndè. Amen.

<sup>13</sup> Mpindyewu, mu kubala kwà mu dindà emu, nkulonga tulonga. Katwèna tuyiisha to—to; ntulonga ànu Mukàndà wà Ebèlù ewu. Mbanganyi bàdi bùmvwà cibàsànkisha? Kaa, s'tudi tupicila mu cikondo cilenga be! Nènku mpindyewu tudì ànu tulonga ne ntèmà yònsò, ku Mufundu ne ku Mufundu. Bidi ne cyà. . . Byònsò nkòong, Bible mujimà mmuswikàkàne pàmwè. Kakwènakù Dìyi nànsha òmwè òdì kadiyi pa kaaba kààDì to, bu Dyòdi mwa kutèèkiibwa pàmwè kùdi Nyumà Mwimpè.

<sup>14</sup> Mpindyewu, bantu bàtu bàmba ne: “Bible ùdi Yèyè mwinè wàmba maalu àbèngangana.” Ndi mèmè muswè kucimòna. Nkààdikù mulòmbèlòmbè munda mwà bidimu makùmi àbi ne bitaanu, cyòci aci, kàdi muntu nànsha umwe kàtukù mwanji kucileeja to. Bible kàtu wàmba maalu àbèngangana to. Byòbi nàнку, kí m'Bible to. Yehowah munène wa kàyi mikàlu awu, kí m'Mufwànyinèkù Yèyè mwinè Wàmba maalu àbèngangana to, pa nàнку kakwènakù maalu àbèngangana mu Bible to. Dìdi ànu ndyumvwà dibi dyà bantu.

<sup>15</sup> Mpindyewu bwà ndambù wa pàà kushìndamijila bitùdi twamba, too ne patwàlukilà. Mpindyewu, Mukàndà wà Ebèlù wùvwà mufunda kùdi Pòlò Munsantu, mufundila beena Ebèlù. Wàkafundila beena Efèsò mukàndà, bàvwà bantu bàà ku Efèsò

abu, Èkèleeziyà wa beena Kilistò; mukwàbò kùdì beena Loomò bàà mu Loomò; ne mukwàbò kùdì beena Ngalàtiyà; ne mukwàbò kùdì beena Ebèlù.

<sup>16</sup> Mpindyewu, tudi tumòna ne Pòlò, bangabanga, ùvwa mulongeshi wa Bible. Ki citùdì bayiilè. Ne wàkalongela ku makàsà a mulongeshi munène, umwe wa ku bàà batàmbe bunènè bàà mu matùkù èndè, Gàmaalièlè. Ne ùvwa mutùkine ne kasukì mu Dipungila Dikùlukulu. Ùvwa mucìmanyè bimpè. Kàdì kulwayè mukèngeshi wa njila uvwa Njila wa Kilistò, bwalu ùvwa mulongesha mu Dipungila Dikùlukulu ku makàsà a balongeshi. Kàdì balongeshi abu, pa ciibidilu bàà musunya . . . Ndi ntèkemena ne ncyèna ngamba bwalu bubi to.

<sup>17</sup> Kàdì, pa ciibidilu, muntu yèyè ànu ne dilongesha nkààyaadi ne ngenzèlu wa maalu wa mu tulaasà, citu pa ciibidilu ànu cikwatakaja kùdì bantu. Nwamònu's, kî ncisònsola to, bwalu cidi cilwa dilongesha dya cilongelu kampànda. Tudi ne byà nàнку leelù ewu. Ba-Presbytériens, ba-Luthériens, beena Mpenta, bilongelu byònsò ebi bìdì ne dyàbì dilongesha dikwatakaja, kàdì bàdì bànunkishamù ànu cyanàànà ndambù wa Mifùndu.

<sup>18</sup> Nènku bìvwa byà mwomùmwè ne mu Dipungila Dikùlukulu. Kàdì, Pòlò, bu mùvwàye mulongesha bimpè, ùvwa mumanyè Mifùndu ku mwakù ne ku mwakù. Kàdì, nudi numòna's, Mifùndu, nànsha wèwè muYimanyè bimpè bishi, Nyumà Yèyè kàyì ùYifùlulula to, dìbà adi dileetà dìdì dishipa. Nyumà ngudi ufila Mwoyi. Nwamònu's, Cidi ne cyà kufùlululudiibwa, anyi kuvwijibwa ne mwoyi, kùdì Nyumà. Nyumà Yèyè kàyì ùvwija Dìyì ne mwoyi ne ùkuvwijilaDì cintu cilelèlè to, dìbà adi dileetà adì dìdì ànu dyà mu meeji. Mwaba awu ngutùdì leelù ewu ne beena Kilistò bààbùngì bàà ku dìnà, ànyì balàkì bàà mukana mùdibo beena Kilistò, s'ndidifwikakajila dyà mu meeji dyà Kilistò adi.

<sup>19</sup> Pashiishe tudi bakatùpikile pa ne: “Ee, s'bìvwa bìkèngela kuumvwayè cintu kampànda; ne bìvwa bìkèngela wèwè kwenzakù cintu kampànda.” Nènku, kaa, netùbwelè mu byònsò abi, paanyimà pàà katancì. Bìvwa bìkèngela muntu kwelayè mbilà. Kale wàwa bìvwa bìkèngela bwà ba-Méthodistes kwelabò mbilà, kumpàlà kwà kucipeta. Bìvwa bìkèngela bwà beena Mpenta kwakulabò mu myakulu, kumpàlà kwà kucipetabò. Kàdì, kaa, bàmwè bàà kùdibo, Bazakadi, bìvwa bìkèngela kuzakalabò. Èyowà. Bàà kale abu. . . Bàvwa bènda bàbànda bàpweka, balùme luseke, bakàjì luseke. Nwamònu anyi? Bazakadi's. Pashiishe Nyumà Mwimpè ùbàtùlulukila ne ùbàzakeeja. “Bàvwa bàMupeta.” Kàdì byònsò abi's bìvwa ànu bifidì byà disànka. Kakwèna nànsha cimwè cyà ku byòbì ciikàle Bulelèlè to.

20 Nzambi mmusòmbèle mu Díyì Dyèndè. “Diitabuuja didi difùma ku ditèeleja, ditèeleja dyà Díyì.” “Ku diitabuuja nkunùdi basùngìdiibwe, ku ngàsà.” Kí nku cinyi ní ncinyi to, nànsha wèwè uzakala, anyi wakula mu myakulu, anyi ní ncinyi cidì cyènzekà. Aci kacyèna ne cya dyenzamù to, nànsha kakesè. Yesù wákamba ne: “Ewu udi utèeleja Méyì Àànyì ne wìtabuuja Yèyè udi muNtùme, ùdi ne Mwoyi wà Cyendèlèlè. Ewu udi utèeleja Díyì Dyànyì ne wìtabuuja,” udici cifuùlùdibwe kùdiye awu, “ùdi ne Mwoyi wà Cyendèlèlè.” Kì cyòci aci. Kantu kakesè kaùdi wenza nànsha kiikàle kàà bishi.

21 Mpindyewu, ncyèna mbènga dizakala, anyi dyakùla dyà mu myakùlu, anyi dizakala, kaa, dyela dyà—dyà mbilà adi to. Abi bìdi ànu bìmpè. Mbìmpè. Kàdi abi mbyambiibwà cyanààna. Nwamònu anyi? Ndi mufwànyine kukupèèsha cimuma cyà pomme cipòola ku mucì, kàdi kùyi ànu mufwànyine kwikala ne mucì awu to. Nwamònu anyi? Udi. . . Abi mbyambiibwà.

22 Kushima, kwiba, kunwà kwà maalà, kunwà kwà mfwankà, kunàyà kwà twartà twà mfrangà, kwenda kwà masandi, abi kí mmpèkaatù to, abi mbyambiibwà byà bupidyà. Nwamònu anyi? Abi mbyùdi wèwè—wèwè. . . Udi ubyèza mbwalu udi ngènzàmpèkaatù. Nwamònu anyi? Kàdi dyàmbedi udi ngènzàmpèkaatù. Kì cidì cikwenzejà byòbi abi, mbwalu kwèna wìtabuuja to. Kàdi wèwè wìtabuuja cyà bushuwà, dìbà adi kwèna ubyèza to. Dìbà adi udi ne dinanga, disànka, ditalala, mwoyi mule, bwìmpè, musàngèelu, bupòle, lutùlù. Kì mamuma a Nyuma Mwìmpè ngòwò awu. Nwamònu anyi?

23 Pa nàнку twètù tudi tupeta tuntu tukesè, tuumasaluka tukesè, mbwalu muntu mmuseesùke ku kajila kàà kale, kapelula kàà Díyì. N'Díyì. “Diitabuuja didi difùma ku ditèeleja.”

24 Pa nàнку pàvwà Pòlò. . . Nzambi wàkasungula Pòlò. Muntu kusungula Maatiyà. Pàvwàyè. . . Bàkeela nshòòbò, kàdi yèyè kààkenzakù kantu nànsha kàmwè to. Aci dìbà adi's cidì cileeja ne mbukolè kaayi bùdi naabù èkèleeziyà, bwà kwenza disungula, bwà kusungula balami bààbò, ne kutùma bayiishi bààbò ku myaba mishìlèshìlàngàne. Aci's ncyà musunya, misangu yàbúngì.

25 Muntu àye kùdi Nzambi ùmulombola bwà kuyayè aku. Mèmè ndi munangè aci. Bantu mu cisangilu cyà muiyi kù bòbò ànu bambè ne: “Ee, èkèleeziyà mulenga's nyèyè ewu. Mwanèetu ewu wìbàkì èkèleeziyà mulenga. Nèнку tudi ne wetù muntu mukèsè mwengeleka.” Nebàmütùmè ku mwinè èkèleeziyà ewu. Kì mbamanyè ne bàdi munkaci mwà kudishipa bòbò nkààyabò to. Nwamònu anyi? Cyà kumpàla, muntu awu yèyè mubwelè muntwamu, kèna mwà kwangatakù kaaba kàà mukwàbò muntu awu to. Dìbà adi bàdi ànu bàtekesha bukòlè bwà èkèleeziyà awu, mu kuteeta kuleeja dilengelela kampànda wa dyengeleka. Bitu misangu yònsò ànu mùshindù awu.



wa mubidi.” Banjèlo kabààkadishinda to, kabèèna ne dijinga ne bupikùdi nànsha. Mubidi ngúvwà mudishinde, bantu, ne bóbò mbàvwà dijinga ne bupikùdi. Pa nànkú, mu mikenji yà kale, muntu, bwà kwikalayè mu—mupikudi, bivwa bikèngela bwà ikalè dyàmbedi cilongo; Mukàndà munènè wà Luutà, wutùdi balongè kaaba aka, kwènji cikòndo awu. Ne mùvwà Nzambi, mwikàle Nyumà, muvwijiiibwe cilongo kutùdi, mu kulwa umwe wa kutùdi, bwa kutùpikula ne kutùpèèsha Mwoyi wà Cyendèlèèlè. Byàkakèngela bwà kulwaYè twètù, bwà ku ngàsà twamòna mwà kulwa bu Yèyè.

<sup>30</sup> Ne tudi tusangana ne Dikunji dyà Kapyà ndyàkalombolà bânà bàà Izalèèlè. Ne pàakavwijiiibwàDi mubidi pànu pa buloba, tudi tuMuumvwa wàkula dīngà ditùkù, Wàmba mùvwàYe Dikunji dyà Kapyà adi. Kwambabò ne: “Udi wamba ne udi munène kutàmba tatwètù Abraham anyi?”

<sup>31</sup> Yèyè kwamba ne: “Kumpàlà kwà Abraham kwikalayèku, NDI.” NDI awu úvwa Nganyi? Dikunji dyà Kapyà mu kaacipuka kàà kàlàkuka kapyà, civùlukilu cyà ku musangu ne ku musangu mu lukòngo ne lukòngo lwònsò; kaciyi ànu lukòngo alu to, kàdi elu lukòngo, Dikunji dyà Kapyà òmwèdimwè adi. Nènku tudi ne kusàkidila mu dindà emu bwà mutùdi mene bapetè fòtò waDì, mùdiYe kàyi mushintùlùke to. Yèyè ki Udi Kàyi ufwà, wa Cyendèlèèlè, Mubènèshiiibwe awu. Ùdi wènza bintu bimwèbimwè mpindyewu byàkenzàYe musangu awu abi, ne mùshindù mwinè wùdìbi bitwènza disànka’s wè!

<sup>32</sup> Kàdi kumpàlà kwà Pòlò kwitabayèku diinè dilabula edi . . . Bu mùvwàye mumanyè ne Mwanjèlo wa Mukalenge úvwa Dikunji dyà Kapyà, uvwa Kilistò awu, ne . . . Èè, Yèyè úvwa Mwanjèlo wa Cipungidi, uvwa Kilistò awu. Mòsà wàkapeta meeji matàmbe bwimpè, mu mùshindù wà ne, wàkasungula ne mbipicèibwe ne mukènge pàmwè ne cisàmbà cyà Kilistò, ne kwikala mulombola kùdi Kilistò, pamutù pàà mabanji ónsò a Èjiipitù awu. Wàkalonda Kilistò, uvwa mu mmwènèkelu wa Dikunji dyà Kapyà awu.

<sup>33</sup> Pashìshe Kilisto kwambaYè ne: “Ndi mufùme ku Nzambi,” pàvwàYe pànu pa buloba apu, “Ndi ngaalukila ku Nzambi.” Paanyimà pàà lufù Lwèndè, dijiikiibwa, dibiiikà dyà ku lufù, mubidi mutùmbishiiibwe musòmbè ku dyàbalumè dyà Mutàmbe bunène, bwà kwakwilangana; Pòlò kuMumònyè bu Dikunji dyà Kapyà, cyàkàbìdì: Bukènkè bwàkamufofomijà mèsù abu, bwambè kumufofomija; bumutwè bufofo.

<sup>34</sup> Peetèlò wàkaMumòna úbwela mu bùlokò bu Bukènkè, ne ùkàngula biibi kumpàlà kwèndè pàvwàye ùpàtuka. Tudi tusangana ne Yèyè nguvwa Alpha ne Omega, Wa kumpàlà ne Wa ndekeelu awu.

<sup>35</sup> Kàdi's ki Yèyè ewu neetù, leelù ewu, wènta bintu ànu bimwèbimwè byàkenzàYe musangu awu abi, ùDìmwènesha kutùdì, ùcileeja beena maalu a mamanya.

<sup>36</sup> Kaa, mu dîbà dinènè dyà mîdimà ne cimvundù cinène pa buloba edi, s'bvwa bikèngela twètù aba kwikala bantu batàmbe kwikala bàà disànka pa buloba, bwà kucyònkomoka, bwà kumanya. Dîbà dyònsò, pàdi bantu ne mitù mipàya, ne tusùmbù ne bikwàbò byà mîshindù yònsò pa buloba, kàdi pààbi, leelù ewu, Nzambi mulelèlè, udi ne mwoyi awu, ku Dîyi Dyèndè ne ku cileeji Cyèndè cyà cimwènèke, ùtùleeja ne Yèyè ùdi neetù kaaba aka, ùkwàta mudimu, ùtwa eku ne eku, mwikàle ne mwoyi, wènta maalu ànu menemene mwàkenzàYe misangu yònsò amu. Mbantu kaayi bàà dyèsè batùdì's wè, bwà kwikala ne cyòci eci! S'bvwa bikèngela bwà twètù. . . Bible mmwambè, dîbà adi, mu nshapità mwi2 ne: "Bivwa bikèngela bwà twètù kukwàta bikolè ku bintu ebi. Bwalu, mmunyi mutwàpàndukà twètù balèngulùle lupàndu bunène nùnku?"

<sup>37</sup> Mpindyewu, tudi balwè kusangana ne, kumpalà kwà Pòlò kwitabayè dilabula adi. . . Mpindyewu, tudi munkaci mwà kwela miji's. Mpindyewu, dilabula ditùdiku benzè nànsha diikàle dyà mùshindù kaayi, nwènù èkèleeziyà, ndi muswè nnùlòmbèku cintu kampànda. Nànsha dyòdi òmwèka dîmpè bîshi, nànsha òmwèka dilelèlè dyà bîshi, didi ne cyà kwanji kwediibwa ku diteeta ku Bible. Misangu yònsò ànu pa Dîyi! Kanùùmukù ku Aci to, bwà dilabula dyà mùshindu kanà wònsò.

<sup>38</sup> Nènku Pòlò, kumpalà kwà yèyè kudiitaba, wàkaya mu Arabie, ne wàkashàalamù bidimu bisàtù, wèla dilabula edi ku diteeta dyà Bible. Nènku pàakaalukilàye, ùvwa mutwishiiibwe. Cintu nànsha cimwè kacivwakù cifwànyine kumutònkola to, bwalu ùvwa mushindàmèene pa Dîyi, kàyi wa bànyungishakù to. Nènku ki pòpò apa pàdiye mpindyewu ùkùdimuka bwà kuleejayè beena Ebèlù aba ne, bintu binènè byàkambiibwà byà, byà mu Dipungila Dikùlukulu abi, bivwa bimwèneshiiibwe mu Yesù Kilstò. Butùmbi kaayi's wè!

<sup>39</sup> Mpindyewu, mu dyàlumingu dishààle, anyi mu diisàtù dishààle, Mwanèètù Neville ewu, mu nshapità mwi5 emu, mmukalengè myaba kampànda yà minène menemene, bwalu nshapità mulenga wa dikèma. Ne tudi tumusangana wàkula pa nshapità mwi4, mu dyàlumingu dishààle, pa *Nsabatu*, dineemekela dyà *Nsabatu*. Nudi batwishiiibwe, mu dindà emu ne, nwàmanyi cidì dineemekela dyà *Nsabatu* anyi? Panwikalà bamanyè, ambàayi ne: "Amen." [Disangisha didi dyàmba ne: "Amen."—Muf.]

<sup>40</sup> *Nsabatu* n' "Diikisha" mutùdi tubwela, kaciyi ku ditùkù, kaciyi ku mikenji to, kàdi ku dibwela dyà mu Kilstò udi wetù *Nsabatu*. Yèyè ki wetù *Nsabatu*. Tudi bacilondèshe cyònsò mu Dipungila Dikùlukulu, ne baleejè ne dîbà òvwa mwà kulwa òvwa Dîyi mwà kulwa "kalongo pa kalongo, kanungu



pa kanungu.” Ki Yèyè kujaadika ne twàkabwela mu Diikisha Dyèndè mu Ditùkù dyà Mpenta ne: “Bwalu eci civwa mwà kufikisha bàdì bacyòke ku kwikisha, ku kulekela.”

41 Tudi tusangana, ne: “Nzambi wàkakòsa ditùkù mu Davìdì, bwà ditùkù dyà mwandamutekète.” Ne: “Nzambi wàkiikisha mu dyà mwandamutekète.” Wàkadipèesha bânà bàà—bàà Izalèlèlà mu cipèèlà. “Ne cyàkàbidì, Yèyè mmukòse ditùkù.” Divwa nditùkù kaayi adi? Nditùkù kampàndà mu lumingu anyi? “Ditùkù dinwàtèèlejà Dìyi Dyèndè adi, kanùpapishi mwoyi wènù to.” Adi nditùkù didìYe Yèyè ùbwela, bwà kunùpèesha ditalala dyà Cyendèlèlèlè, Nsabatu wa Cyendèlèlèlè.

42 Kwèna uya mu èkèleeziyà mu dyàlumingu, bwà kulwa mutèndeleeedi to, dîbà adi. Paùdì ulediibwa ku Nyumà wa Nzambi, mpaùdì ubwela mu Diikisha bwà kashidi, kakwèna kàbidì byà dineemekelela dyà nsabatu to. Udi mu Nsabatu, dîbà dyònsò, bwà kashidi, ne bwà Cyendèlèlèlè. “Midimu yèbè yà maalu a pa buloba yàjikì,” mùdì Bible wàmba, “ne wàbwedi mu ditalala dîbènesha edi.”

43 Nshapìtà yitaanu yà kumpàla eyi yìdì yitèeka Yesù pa mwaba bu Mwakwidi Munène. “Nzambi mu bikondo byà kale ne mu mishindù mishilèshilàngàne wàkaakwila ne baataatù kùdì bapròfetà, kàdì mu ditùkù dyà ndekeelu edi ku Mwan’Èndè, Yesù,” nshapìtà wa kumpàla, mvensà wa kumpàla.

44 Pashìshe ànu nànkù too ne ku ndekeelu kwà nshapìtà mwi5, tudi tuMusangana muleejìbwe bu Melekisedekè, Uvwa kàyi ne mbangilu wa matùkù, anyi ne ndekeelu wa mwoyi awu, kàdì dîbà dyònsò ànu Mwakwidi bwà kashidi. Anjì elàayi meeji ku bwalu abu. Muntu munène ewu ùvwa Nganyi? Netùcyùmvwè, mu nshapìtà mikwàbò mitwè ku yìbidì, mwoyi Wèndè mujimà, ngutwikalà mwà kulonga: Muntu munène Wàkatwilangana ne Abraham ewu, Uvwa kacya kàyikù ne papa, kàyikù ne maman, Yèyè kàvwakù ne dîbà divwàYe mubangè kwikala ne mwoyi, anyi Kààkwikalakù ne dîbà dyàfikàYe ku ndekeelu kwà mwoyi to. Nènku Wàkatwilangana ne Abraham ùfùma ku dishebeya dyà mfùmù.

45 Mònaayi Mupersona munène ewu, nànsha ne Ùvwa Nganyi, ùcìdì ànu ne mwoyi. Kàvwa ne ndekeelu wa mwoyi to. Ùvwa n’Kilistò, wàkatwilanganàye nendè awu. Netwènzè dilonga dyà ndòndò pa cyòci aci, mu matùkù makesè aa.

46 Mpindyewu, tudi baswè kubangila apa ku nshapìtà mwi5 mpindyewu, ànu bwa kaaba kakesè kàà pàà kushindamijila bitùdì twamba kumpàla kwà kulenga nsha—nshapìtà mwi6, bwalu ncintu kampàndà cinène menemene. Tàngilàayi ne ntèmà. Netùbangilè lwà ku mvensà wa 7 wa nshapìtà ewu. Ee, tùbangilàayi ku mvensà mwi6.

*Bu mùdiye wàmba kàbìdì mu mwaba mukwàbò ne: Wèwè udi mwakwidi bwà kashidi wa mu mulongo wà Melekisedekè.*

*Yéyè mu èndè matùkù a mubidi wèndè, pààkalàmbulàye . . . masambila ne misèngeleelu pàmwè ne mwadi mukolè . . . binsònjì kùdì . . . yéyè uwà ne bukolè bwà kumusungila ku lufù, ne bàakamuumvwila mu cyàkacìnnàye;*

*Nànsha mùvwàye Mwànà, kàdi wàkayiila . . . ditùmikila ku maalu àkakèngèlàyè awu;*

47 Mpindyewu ki mwaba wùndì muswè kufika ewu, mvensà wa 9 ewu. Tèèlejàayi. Ngeela meeji ne Mwanèètù Neville úwà mucilengè, mu diisàtù. Mémè ncìwàpù to. Èè, tèèlejàayi.

*Ne pààkarwijiibwàye mupwàngàne, wàkalwa mutwàdi wa lupàndù lwà cyendèlèlèlè kùdì bònsò bàdì bàmutùmikilà;*

*Wakabìkidiibwa kùdì Nzambì ne mmwakwidi munène wa mu mulongo wà Melekisedekè.*

*Bwà bwalu bwèndè tudi ne bintu byàbúngì byà kwamba, . . .*

48 Tudi tucishìila apu pa cyòcì aci, bwalu netwàngatè Melekisedekè mu ndambù wa malòlò.

49 Mpindyewu netùbangile pa cyòcì eci, dilonga dyètù dyà ciibidilu adi. Ndi muswè. . . Nèngánjì ànu kubala bikwàbò byà ku cyòcì eci bwà katançi, mvensà wa 11 ewu.

*Bwà bwalu bwèndè tudi ne bintu byàbúngì byà kwamba, . . . bikolè pa kubipátula mukana, pa kumòna ne nwènú nudi ne luumvu lucipàle.*

*Bwalu pàvwàbi . . . cikondo cìvwàbi bikèngela nwènú kwikala balongeshi, nwènú nudi ne dijinga dyà muntu kunùlongeshayè cyàkàbìdì bìdì biikàle maalu a cibangidilu cyà mèyi mamba kùdì Nzambì; ne nukàadi balwè bu bàdì dijinga ne mabèele, pamutù pàà byàkudyà bikolè.*

*Bwalu ewu yònsò udi wamwa mabèele mmupangè bukolè mu díyi dyà bwakàne, bwalu ùcìdi mwànà wa mu dibòkò.*

Kaa, ndi ntèkemena ne Nyumà Mwímpè wàpwekèshì aci munda mwènú mpindyewu.

*Bwalu ewu udi—udi wamwa mabèele mmupangè bukolè mu díyi dyà bwakàne, bwalu yéyè ùdi mwànà wa mu dibòkò.*

50 Wèwè mupèeshe mwànà wa mu dibòko cyàkudyà cicolè, s'udi umushebeya. Ki bwà cinyi bantu bààbúngì bàtu bàmba ne: "Aa, mémè—mémè ncyèna ngiitabuuja aci to," bàasa

Iwendu bàya. Bàcidi ànu bânà bàà mu mabòko! Kabèèna ànu mwà kuumvwa to. Kabèèna mwa kubàkula Bulelèlè abu to. Bùdi—Bùdi bùbàshebeya. Bintu binène, byà bukolè bìvwà bikèngelà bwà èkèleeziyà kumanyayè leelù ewu, kàdi kwèna mwà kuBilongeshakù to. Bàdi—bàdi—bàdi—bàdi—bàdi bàlèndukilaPù. Kí mbamanyè cyà dyanza naaBì to.

51 Pólò, wàkula ne cisùmbù cyà beena Ebèlù eci... Pààbì's, bamanyi bàà mabàla's mbàdiye wàkula naabò mpindyewu aba, bamanyi bàà mabàla, balongesha bìmpè. Netùmonè aci, mu katanci kakesè—kakesè emu, bàà dimanya ditwè ngwengwengwe bàà dikèma. Kàdi Bwalu busokoka bwà nyumà bwà ndòndò, èkèleeziyà ùcidi ànu mufomija bwà kàyi mwà kuBùmòna to. Mmwambè ne: "Pàvwàbi bikèngela bwà nwènù kulongesha bakwàbò, núcidi ànu bânà bàà mu mabòko."

52 Kaa, ndi mumanyè ne kùdi bààbùngì bàdi bàjuuka bàpàtuka bàmba ne: "Kàà, mèmè ncicyèna kàbìdi dijinga dyà kuya mu èkèleeziyà nànsha. Nzambì àtumbè, Nyumà Mwímpè ùkaadi mulwè, Yèyè ngudi mulongeshi." Paùdi ne awu mmwènenù, udi ànu mu ntùpàkànyì. Bwalu bwà cinyì Nyumà Mwímpè mmutèèke balongeshi mu Èkèleeziyà piikalàbi ne Yèyè nguwwa ne cyà kwikala Mulongeshi? Nwamònu anyi? Kùdi dyàmbedi bàpostòlò, baprófetà, balongeshi, batangadiki, ne bampaasàtà. Nyumà Mwímpè mmutèèke balongeshi mu Èkèleeziyà, bwà Wàmòna mwà kulongeshila ku yèyè mulongeshi awu. Nènku byòbì ne kí—kí mbilondèshile Diyì to, Nzambì kèna ùcìshindikakù to, dîbà adi kí ndilongesha dyà mùshindu mujaalàme to. Cidi ne cyà kunwàngana ne Bible mujimà, ne kwikala ne mwoyi leelù ewu ànu mùvwàCi musangu awu amu. Ki cintu cilelèlè cimwènèshìlbwe ncyòci aci.

53 Mpindyewu mònaayi.

*Kàdi cyàkudyà cicolè mbwà aba bàdi... bakolè bapwile, aba mene bàdi ku dikwàtakwàta mudimu... bàtù bakwàte mudimu ne byumvwilu byàbò bìibidija ku kujingulula kwà bimpè ne bibi.*

Kumanya cidi cimpè ne cidi cibi, ku dijingulula.

54 Mpindyewu mònaayi, tudi tubangila mpindyewu pa dìleesònà dyètù adi. Mwaba munènè ewu wà kujaadikila bitùdi twamba mpindyewu, tuyaayaaku ku mvensà wa kumpàla.

*Ki bwà cinyì tushiya maalu a ku cibangidilu a dilongesha dyà Kilistò... .*

Cidiye wàmba ncinyi? Nshapità yònsò yìtaanu yà kumpàla eyi mmitèekela pa Kilistò, bwà kuleeja ne Yèyè ùdi Nganyì. Mpindyewu tudi tushiya maalu a ku cibangidilu a dilongesha dyà Kilistò awu.

55 Tudi tusangana ne Yèyè ùdi cinyi? Twàsangànyì ne Ùvwa Yehowah Munène awu mumwènèshìlbwe mu mubidi.

Twásangànyì ne Yèyè kàvwa—kàvwa mupròfètà to, kàdi kaabujimà kàà Bunzambì mu mùshindù wà mubidi. Ùvwa Yehowah muvwijìbwe mubidi. Ne mubidi awu, Yesù, wùvwa ànu muMwelè mu ntentà cyanàànà. Nzambì musòmbèle mu muntu. Nzambì mupungisha ne muntu, kupicila ku muntu, ku dilediibwa dyà kùdi virgo dyà Mwan'Èndè Sungasunga. Nènku Yehowah, Nyumà awu, ùvwa musòmbèle munda Mwèndè.

<sup>56</sup> Mpindyewu, mbanganyi bàdi bavùlùke dilongesha dyà pa Bunzambì adi, mutùvwà baalùkile basangàne Nzambì bu mwanzankòngòlò munène mwikàle ne Nyumà mushiilàngàne ànu menemene, mùvwàBu amu? Ne pashiishe Logos kupàtukaYè mu Nzambì, wàkalwa tèòfàní, ne uvwa mu mmwènèkelu wa muntu awu. Ne Mòsà wàkaMumòna ùpita mwaba awu, yèyè mu mutanta wà lubwebwe. Ne pashiishe tèòfàní awu kakùyi mpatà to wàkavwijìbwa mubidi wà buntu, Kìlistò.

Ne mutùdi tusangana ne twètù, ku ngàsà Wendè, tudi ne Mwoyi wà Cyendèlèlèlè. Mpindyewu, mwakù *kashidi* mbwena kwamba ne “bwà ntàntà kampànda; bwà cipòdòlò kampànda cyà cikondo.” Mbambè mu Bible, ne: “*Kashidi ne kashidi,*” mutwàngaji. Kàdi *kashidi* ùdi ùmvwija ànu “cikondo kampànda” cyanàànà. Kàdi Cyendèlèlèlè mbwena kwamba ne kashidi. Ne ànu cintu cìvwà ne ntwàdijilu aci ki cìdi ne ndekeelu, kàdi bintu bìvwà kabìyi ne ntwàdijilu kabyèna ne ndekeelu to. Pa nàнку Nzambì kàvwa ne ntwàdijilu to ne Kèna ne ndekeelu to.

<sup>57</sup> Nènku, ki bwà cinyì, Melekisedekè, Mwakwidi munène awu, bu muntu, Kàvwa ne ntwàdijilu ne Kèna ne ndekeelu to. Nènku twètù, kupicila ku tèòfàní awu, cìdi, twàkenjiibwa mu cimfwànyì cyà Nzambì kumpàlà kwà dyulu ne buloba kabìyikù byanji kufùkiibwa to; pààkavwijìbwa tèòfàní awu mubidi ne kusòmbelayè munkaci mwètù, dìbà adi, kupicila ku lufù Lwèndè, twètù biinè tudi tupeta Nyumà Wendè ne katwèna ne ndekeelu to; Mwoyi wà Cyendèlèlèlè; katùyi Banjèlo to, kàdi bantu balùme ne bantu bakàji. Kaa, ndi. . . Mu mùshindù kampànda anyì kansanga, bu mèmèku ànu ne mùshindù wà kucyàngata bwà batèèleji bàànyì—bàànyì bààmònakù mwà kucibàkula's! Wèwè kwàdyàkwikalakù Mwanjèlo to. Nzambì wàkenza Banjèlo, kàdi Nzambì wàkenza bantu. Ne cìdi Nzambì wènza cìdi cipàtukila mu Nzambì, ciikàle cyà Cyendèlèlèlè ànu mùdi Nzambì amu. Ne muntu ngwa Cyendèlèlèlè ànu mùdi Mumufùki wendè amu, bwalu yèyè wàkenjiibwa kacya ku Cyendèlèlèlè.

<sup>58</sup> Kàdi mpèkaatù ùdi ne ndekeelu; dikènga dìdi ne ndekeelu. Ki bwà cinyì, kakwèna mwa kwikala ifernò wa Cyendèlèlèlè nànsha. Kùdi ifernò, kapyà ne soufre, aci tudi bamanyè, kàdi kakwèna ifernò wa Cyendèlèlèlè to. Kùdi mùshindù ànu wùmwèpèlè wà Mwoyi wà Cyendèlèlèlè ne awu ngwà Nzambì. Byòbi bikèngela bwà wèwè kukènga kashidi, apu's udi ne Mwoyi

wà Cyendèlèlè's. Ìfernò ùdi ne ndekeelu, ùdi mwà kwikala wa bidimu miliyaalà, kàdi ndekeelu wa byònsò neàkiimàne.

<sup>59</sup> Bible, mwaba nànsha wùmwè, kènàku wàmba ne bààkakènga Cyendèlèlè to, mmwambè ne: “Kashidi ne kashidi.” Yona wàkeela meji ne ùvwa mu difù dyà mushipa wà bàlèna awu “kashidi,” yèyè pèndè. *Kashidi* ùdi ne ntàntà anyi cikondo cikòsa. Kàdi *Cyendèlèlè* ncyà ku musangu ne ku musangu, kacyèna ne ntwàdijilu anyi ne ndekeelu to. Mbyenzè bu mùdì mpètà wa ku munu, kajèngù. Nènku pàdì ànu dîbà dyètù ditùngùnùke dyènda diya, tudì ànu mu kwenda kunyùngulukila twipàcilà tunènè twà Nzambi.

<sup>60</sup> Kiipàcilà kàà Nzambi kàvwa nkàà kwenza muntu mu cimfwànyì Cyèndè, bwà kwikalayè mu dyumvwangana Nèndè. Ki kumwenzaYè kampànda wa bàlènga ne byanza. Mpindyewu, mpèkaatù mmutùbwejè mu mwaba wà—wà—wà dinyanguka, kàdi aci kacýènakù cìmanyika ndongamu wa Nzambi to. Nènku, wèwè mulundà wanyì ngènzàmpèkàatù, leelù ewu, pawikalà kùyi mulediibwe cyàkàbìdì kùdì Nyumà wa Nzambi to, udi ushìikila mwaba kampànda. Ne ndekeelu webè ncimvundù cinène, mu cinyangu, ne dikènga ne kasubà. Kàdi wèwè udi mwitàbùùje Mukalenge Yesù, ne muMwitàbe bu Musùngidi webè sungasunga awu, mbyà Cyendèlèlè ànu mùdì Nzambi wa Cyendèlèlè amu. Kwèna ne ndekeelu to: “Ndi mmupèèsha *Zoe* wa Cyendèlèlè, Mwoyi Sungasunga wà Nzambi, ne kààdyàkubùtukakù anyi mene kupicila ku cilumbulwidi to, kàdi mmuumùke ku lufù muyè ku Mwoyi.” Ki cìvwàYe. Ki cyàkavwilàYe.

<sup>61</sup> Mpindyewu, Yesù, ku dilwa Dyèndè, dyà bwakwidi Bwèndè, kààkalwa ànu bwà dyumvwilangana dyà luse nànsha. Bantu bààbùngì bàtu bàcilongesha mùshindù awu ne, Yèyè wàkalwa, wàmba ne: “Èè, pàmwàpa bu Mémè mwà kukènga, Nèngùikalèku cintu cyà—cyà—cyà bàmòna bùmvwà luse nènku bantu nebàlwe kùNdi.” Aci's ndipanga. Kakwènakù Mufundù bwà cyà nàнку to.

Bwalu, muntu yònsò wìkalakù ne cyà kusùngidiibwa awu, Nzambi ùkaavwa mumumanyè kumpàlà kwà dyulu ne buloba kufùkiibwabì. Bible ngudi mwambè nàнку. Nzambi, nànsha nàнку, kì mmuswè bwà muntu nànsha umwe àbutukè to. Mmuswè bwà bwà bònsò bàfikè ku kanyinganyingha. Kàdi, Yèyè bu Nzambi, ku didyànjlila-kumanya Yèyè ùkaavwa mucimanyè.

<sup>62</sup> Tàngilàayi mu Loomò, nshapìtà wa 8. Pòlò ùvwa ùsùminyina mwaba awu, wàmba bwà disungula dyà Nzambi, ne: “Esawù ne Yakòbò, kumpàlà kwà yònsò wa ku bàna abu kulediibwayè, anyi nì ncinyì cyònsò, Nzambi wàkamba ne Ùvwa mubàmanyè ne wàkakina Esawù ne wàkananga Yakòbò,” kumpàlà kwà yònsò wa ku bàna abu kupetayè mpù—mpùngà wa kuleejayè kusàkidila kwèndè, bwalu Yèyè ùvwa Nzambi. Ùvwa mumanyè. . . Kàtu ne

mikalù to. Piikalàbi ne Kàtu ne mikàlu, Ùvwa mumanyè nkùpà yònsò, lujijii lwònsò, kajijijijii kònsò, kantu ne kantu kònsò kàvwàku mwa kwikala pa buloba, Ùvwa mukàmanyè. Yèyè ùdi Nzambi wa kàyi mikàlu, wa Cyendèlèlèlè, wa kàyi mwà kufwà, mubènesha, wa ngulu yònsò, mwikàle myaba yònsò, mumanyè byònsò. Kakwèna cidiYe kàyi mumanyè to. Ki bwà cinyi Ùdi mwà kwamba cìikalà ndekeelu. Ùvwa mumanyè ndekeelu kacya ku cibangidilu.

<sup>63</sup> Cyà cipròfeta cidi ànu dimanya Dyèndè adi. Yèyè mmulumbulwidyanganyi munène. Yèyè—Yèyè ùdi—Yèyè m'Mulumbulwishi. Ne Yèyè ùdi wàmabila mwa—mwakwidyanganyi ànu ndambù wa lungènyi Lwèndè cyanààna. Ki cidi cipròfeta ncyòci aci, cidi mwà kudyànjila kucyàmaba, bwalu Yèyè mmumanyè cìikalàku. Mpindyewu, ki Nzambi utùdi twètù tukwàcila mudimu Nyèyè awu. Kàyi nzambi kampànda wa mu myanu, kàyi bu ba-Bouddhistes ne ba-Mùzulùmanyi, ne bikwàbò byònsò abi to. Kàdi, Nzambi udi myaba yònsò, apa mpindyewu mene, mu dindà emu, mu tabernacle emu mpindyewu mene; Yehowah munènè, NDI, WàkaDibùngakaja mu didipwekesha awu, bwa kwangata mmwènekelu wa mubidi wà mpèkaatù. S'ki Yèyè ewu. Ki Yèyè wàkakusungila awu. Kakwèna mwà kwikala mukwàbò to, mwaba nànsha wùmwe, kàyi mwà kucyènza mu cikòndo nànsha cimwè to.

<sup>64</sup> Nzambi kàvwa ne bantu bàsàtù mwab'awu, kàdi kutùma umwe wa ku bòbò, Mwan'Èndè nànsha. Ùvwa n'Nzambi, Yèyè mwinè, mulwè mu mmwènekelu wa Mwànà. Mwànà kampànda ùtu ne ntwàdijilu, ne Mwànà awu ùvwa ne ntwàdijilu. Aci, bàmwè bàà kunùdi nwènu beena Kàtòlikè bananga, mèmè ndi ne Mukànda wènu, *Malelèlè À Dìitabuuja Dyètù*, mwambè ne: “Buumwànà bwà Cyendèlèlèlè bwà Nzambi.” Nenùjikulè awu mwakù bishi? Nenùwùfikishè ku diikala wà meeji bishi? Cidi mwà kwikala cyà Cyendèlèlèlè bishi? Aci kí m'Bible nànsha. Aci mmukànda wènu nwènu awu ne: “Buumwànà bwà Cyendèlèlèlè.” Kabèèna. . . Awu mwakù kí ngwà cyà bushùwà nànsha. Bwalu, cyònsò cidi mwànà civwa ne ntwàdijilu, ne cyà Cyendèlèlèlè kaciyèna ne ntwàdijilu to, pa nàngu kí mbuumwànà bwà Cyendèlèlèlè nànsha. Kilistò wàkalwa mubidi ne wàkasòmbela munkaci mwètù. Ùvwa ne ntwàdijilu. Kacivwa Buumwànà bwà Cyendèlèlèlè nànsha. M'Bunzambi bwà Cyendèlèlèlè, kí mbuumwànà to. Mpindyewu, Wàkalwa bwà kutùpikula, ne Wàkatùpikula cyà bushùwà.

<sup>65</sup> Mpindyewu, Pòlò, ùkùfika, ndi mutwìshìbwe ne mu màleesònà mashààle nudi bacyùmvwè. Netùcyàmbùlùlè, musangu kumpàlà, bu Mukalenge mwà kwanyisha, ànu ku mvensà ne ku mvensà. Mpindyewu.

*Ki bwà cinyi biikàle. . . tushiyà maa—maalu a ku cibangidilu a dilongesha dyà Kilistò, tuyaayi kumpàla too ne ku bupwàngàne; . . .*

66 Aci's cidi cibàlèndwisha, kî mmwômò anyì? Twènzàayi cinyi?

...twètù tùyaayi kumpàla too ne ku bupwàngàne;  
katùyi tutèeka cyàkàbìdì bishimikidi...

67 Tàngilàayi eci. Twàngatàayi mwakù ewu “bupwàngàne.” Nutukù bamanyè ne kùdì mùshindù ànu wùmwèpelè wuwìmanàku mu Bwikadi bwà Nzambì anyì? Ngwà ne, kwikala mupwàngàne. Nzambi kéna mwà kutwàlakù bintu byà kabìyi byà cijila to.

68 Nènku nwènù beena ne ànu mikenji abu: mmunyi mùdiku mwà kudìpwàngàja wèwè mwinè, paùdì kùyi ne cyà kudìpwàngàja naaci nànsha cimwè? Wèwè's udi mulela mu mpèkaatù. Dyèbè diimiciibwa diinè's òvwa mmu mpèkaatù. Dijinga mene dyà wèwè kwikala pànwapa's òvwa mmpèkaatù. “Mulela mu mpèkaatù, mufwimba mu bubì, mulwè pa buloba wamba mashimi.” Mpindyewu pawikalà mwà kwimanyina ki penyi?

69 Mpenyi, wèwè ngènzàmpèkàatù, udi—udi mwambè ne: “Nèndekelè kunwà mfwankà. Nènye mu Dyulu” awu? Mpenyi, wèwè mwena Kilistò wa civùmvù, mulami wa maalu a kaabukùlù, wa ku dìnà, udi wendakana apa ne mpàla mwela muulu, ne: “Èè, mèmè's ndi wa mu èkèleeziyà” awu? Wèwè ngènzàmpèkàatù ewu. Ncyà bushùwà. Wèwè kùyi mulediibwe kùdì Nyumà wa Nzambì to, s'udi mujimine. Aci's ncilelèlè.

70 Mmunyi muwàyà mu Dyulu's? Wèwè udi wamba ne: “Ncìtukù mwanji kushima to kacya bàndela.” “Kaa, munanga awu. S—s'ùvwa ànu Mwanjèlo wetù ewu's, twamb'eku twamb'eku.” Aci's mmafi. Nànsha wèwè mwimpè wa bishi; udi ngènzàmpèkàatù. Kàbìdì kwèna ne cintu nànsha cimwè to; kakwèna nì nnsasedose, nì mmwèpiskòpò, nì nkàrdinalè, nì mmpaapà, nì ncinyi cikwàbò cidi mwà kukusungila to, bwalu yèyè awu ùdi ànu mu kantu kaluka kàmwèkàmwè mùdì usanganyiibwa amu. Netùbwelèmù mu katanci kakesè emu. Ànu mu mùshindù wùmwèwùmwè awu. Yèyè awu ùvwa... paapà wa ku Loomù awu's mmulela mu mpèkaatù, mufwimba mu bubì, mulwè pa buloba wamba mashimi, mulela ku dijinga dyà disangila dyà mulùme ne mukàjì. Kuwàshaadilà mwakàne ki kwèpì mu aci?

71 “Ee, tatwèndè ne mamwèndè's mbalela mu mùshindù ànu wòwù wùmwèwùmwè awu, ne bòbò's mbalela mu mùshindù wùmwèwùmwè awu, ne kakwèndè mukàjì ne kakwèndè mulùme too ne paanyimà pààpa.” Mmpèkaatù, ànu kwìnè kwònsò aku!

72 Pa nàнку nganyì udi mwà kwamba ne *cikampànda* ncyà cijila ne *cikansanga* ncyà cijila? Kùdì cintu cyà cijila ànu cimwèpelè, ki Yesù Kilistò, Mwànà wa Nzambì udi ne mwoyi, Wàkavwijiibwa mupwàngàne awu. Nènku citùdì balòmbiibwe mbwà kwikala bapwàngàne. Mpindyewu, netwikalè nàнку

bìshi? Ùditeetèlèci, wêwè mwinè. Ndi mufwànyine kuumvwa bibi bwà kuteeta bwà kuya mu Dyulu ku dikumbanyina dyà ne: “Bàndedi ànu mu tusunsa tùtaanu emu, ne nêngùumukè pa buloba mpindyewu mene.” S’ndi mufwànyine kujìmina. Mémè ncìyikù mwanjì kupeta meeji mabi kacya bàndela to, ne ncìyikù mwanjì kwamba díyì dibi kacya bàndela to, ne ncìyikù mwanjì kutàngila cintu cibì, ncìyikù mwelè meeji mabi, anyì cintu nànsha címwè to, ndi ànu nnunka bibì ne mufiike ànu mùdì bimanu byà manyaanu byà mu ifernò. Ndi ngènzàmpèkààtù.

<sup>73</sup> Ndi mufwànyine kulwa pànwapa kàdi kushààla mukàngila mu cibambalu kampànda, mùdì bàmwè bàà ku baamànseelà bàà ba-Carmélites anyì cintu kampànda, ne ncìyikù mmòna maalu a pa buloba to, mushààlemù nsambila matukù àanyi ònsò a mwoyi, ngenza maalu mímpe, mulela ne tètè mu nzùbu tètè pambèlu mpèèsha bapèlè cyònsò cìndi naaci, kàdi ndi ànu ngènzàmpèkààtù ne nènye mu ifernò. Èyowà’s, mukalenge.

<sup>74</sup> Ndi mufwànyine kuya kashààla wa mu èkèleeziyà wa ba-Luthériens, ba-Baptistes, beena Mpenta, ba- Presbytériens, pàncidi ànu mu kalààlù apu, ne kwikala ne nsòmbelu wa lùlamatu kùdì èkèleeziyà awu too ne pàndì nkumbaja bidimu lukàmà, ne mwoyi wànyì kwangaciibwawù, ne muntu kàyikù mufwànyine kumfunkuna munu ne bàme ne “Kacya kàtukù mupetè nansha dyeji dibi dimwe to,” mémè’s nènye mu ifernò ànu mudibi bulelela ne ndi mwimàne emu.

<sup>75</sup> Ndi ngènzàmpèkààtù. Aci mmwòmò. Ncyèna ne cintu nànsha címwè to. Kakwènakù mùshindù to, nànsha kakesè, wùndiku mufwànyine kupeta mu—mushinga wà kufuta to. Nzambi mmulòmbe lufù. Ne mémè mufile mwoyi wànyì sungasunga, mémè mufile mwoyi wànyì, díbà adi mmunyi mùndì mwà kunyingalala? Bwalu, wêwè. . . Bikèngela dibànzà dyànji difuciibwè, dyàmbedi. Ne Nzambi nguvwa Umwèpelè uvwa mwà kutèeka mwoyi Wèndè pànshì ne kuWàngata cyàkàbìdì. Pa nànkù Yèyè ùvwa mwà kulwa mpèkaatù, kutèeka Mwoyi Wèndè pànshì ne kuWàngata, ne kucibìikila ne m’“bwakàne,” ne dibànzà difuciibwa. Ki bwalu mbwòbù abu’s.

<sup>76</sup> Mpindyewu tùbuululàayi mu Maatàayi, lwà ku nshaapità wa 8 aku, ngeela meeji ne nyèyè, wa 7 anyì wa 8. Netùmonè cìdì Yesù wàmba kaaba aka. Èyo. M’Maatàayi, nshapità mwi5. Ne. . . Yesù, ùyiisha, mwikàle ùyiisha pa masànka, ku mvensà wa 47.

*Ne nwènù nwela mwoyi ànu bânà bèènù nkààyaabò,  
ncinyì cinùdì nwènù nwenza citàmbe cyà bakwàbò?  
Bampùblikaanò kabèèna pàabò bènza. . . ? (Tàngilàayi.)*

*Kadi ki bwà cinyì ikàlaayi bapwàngàne, . . . (Cinyì?)*

*Ki bwà cinyì ikàlaayi bapwàngàne, ànu mùdì Taatù  
wenù udi mu dyulu mupwàngàne amu.*

Adi divwa ndiyi ditùmà dyà Yesù ne: “Ikàlaayi nànkù.”



77 Bòbò bàdi bamba ne: “Muntu nànsha umwe kèna mwà kwikala mupwàngàne to, Bible mmwambè ne: ‘Kakwènaku mupwàngàne nànsha umwe to.’ Ki dibèngangana dyènù dyà mèyi’s ndyòdi adi.” Mmwòmò anyi? Eyo.

78 Kwèna mwà kwikala mupwàngàne mu wèwè mwinè to. Wèwè weyemena cyùdi wèwè mwenzè, udi mujimìne. “Pa nànu ikàlaayi bapwàngàne, ànu mùdi Nzambi mupwàngàne amu.” Mpindyewu:

*Ki bwà cinyi ikàlaayi bapwàngàne, ànu mùdi Taatù wenù. . . mu dyulu mupwàngàne amu.*

79 “Ki bwà cinyi. . .” Mpindyewu nshapità mwi5, nshapità mwi6 wa Ebèlù.

*Ki bwà cinyi tushiya maalu a ku cibangidilu a dilongesha dyà Kilistò, tuyaayi kumpàla too ne ku bupwàngàne; . . .*

80 Mpindyewu, nwènù, Branham Tabernacle. Kaa, ndi mumanyè ne: “Tudi ne dyondopa.” Aci’s ncilenga be. “Tudi ne bikèèna-kumòna.” Kaa, aci’s—aci’s ncilenga. Kàbìdi nudi ne bilòòtà byà nyumà, kàdi mîngà misangu kabiyi bilòòtà byà nyumà to. Ne—ne mîngà misangu nudi. . . “Twètù, tutu tuteeta kwambulwisha bapèlè. Tutu twenza citùdi pèètù mwà kwenza aci.” Kaa, aci’s ncimpè’s, kàdi citùdi twamba mpindyewu eci kí ng’aci to. Tudi munkaci mwà kubwela mu citùpà cikwàbò.

*. . . tushiya . . . dilongesha . . .*

81 “Kaa, èyowà’s, twètù’s tudi ne dilongesha dyà Kilistò. S’tudi twitabuuja ne Yèyè ùwà Mwànà wa Nzambi, ne mmulela kùdi virgo. Twètù’s tudi twitabuuja aci, pàmwe ne bintu byònsò ebi.” Aci cìdi ànu cilenga be.

82 Kàdi: “Tushiya abi, tuyaayi kumpàla too ne ku bupwàngàne.” Kaa, ekèlekèlè! Mvw’a kujinga ngikalakù ne dîyi dyà mwàrkanjèlo mpindyewu, bwà kufikisha eci mu mùshindù wà nwènù bafwànyine kucimòna’s. Mpindyewu yèyè ùdi wàmba ne: “Tushiya dilongesha dyònsò dyà Kilistò,” beena—beena tèlòlòjì bònsò, ne tèlòlòjì yònsò utùdi bamanyè awu, byònsò byà Bunzambi bwà Kilistò abi, mùvwàYe Nzambi muvwijilbwe mubidi, bintu bikwàbò byònsò ebi abi.

83 Pòlò mmutùngùnùke ne kucyùmvwija cyònsò kaaba aka, ànu mu tusunsa tukesè cyanààna emu. Twànjàayi ànu kucibala, ànu kakesè cyanààna, kumpàla kwà twètù kukùfika.

*. . . tutèèka cyàkàbìdi bishimikidi byà kanyinganyinga kàa ku midimu mifwè. . .*

Mpindyewu, tudi twitabuuja aci.

*. . . ne diitabuuja kùdi Nzambi,*

Tudi twitabuuja aci.

*Ne byà dilongesha dyà mabàtiiza, . . .*

Mùshindù mwîmpè wunùdi ne cyà kubatiijiibwa, tudi twitabuuja aci.

*... ne byà ditentekelangana dyà byanza, ...*

Tudi twitabuuja ditentekelangana dyà byanza, kî mmwômò anyi? Nwamònu's, byònsò abi, bushùwà's.

*... ne byà dibìikà dyà ku bafwè abi, ...*

<sup>84</sup> Tudi twitabuuja aci. Mpindyewu tàngilàayi. Nudi numòna kaaba aka ne, “Dilumbulwisha,” mbodyámbe, “dya Cyendèlèlè.” Ki kashidi nkòkò aku. Pàdìbi ne dilumbulwisha ndyamba kùdi Nzambì, mbwà kashidi. Dìbà adi, kakwèna mwà kwikala cyàkàbìdi dipungisha paanyimà pàà dilumbulwisha dimanè kupita to. Mpindyewu nudi mwà kuumvwa bwà cinyi byàkakèngela bwà Nzambì, mutùdi bafwànyine kucibìikila ne, àngatè bwanga Bwèndè Sungasunga—Bwèndè Sungasunga. PààkapiìshàYe muntu bwà dyenza dyà mpèkaatù, mùshindù wùmwpèlè wùvwàYekù mufwànyine kupungishangana, wùvwa ngwà Yèyè mwìnè kwangata kaaba kàà muntu. Ki mùshindù wùmwpèlè wùdiyèkù mwà kupungishiibwa, anyi mufwànyine kutùpungisha twètù, ngwà kwangata kaaba kèètù ne kulwa ngènzàmpèkaatù. Nzambi, Yehowah, wàkalwa ngènzàmpèkaatù, ne Wàkafila mwoyi Wèndè.

<sup>85</sup> Mpindyewu, wèwè udi mufwànyine kufila mwoyi wèbè, bu ngènzàmpèkaatù, bwà kufwila bwalu abu. Pòlò mmwambè ne: “Nànsha mèmè mufile mubidi wànyì bwà kwoshiibwawù bu mulàmbù, ncidi ànu cintu cyanààna,” bwalu kacyaakukumbana nànsha. Nwamònu's, paùdi ufwà, kwèbè nkujikè. Wèwè mufwè bu ngènzàmpèkaatù, udi mujimine.

<sup>86</sup> “Kàdi Nzambì wàkatùùluka mu mubidi, ne wàkapiìsha mpèkaatù mu mubidi, mwikàle muvwijìibwe mubidi wà mpèkaatù.” Bwalu, Yèyè ùvwa Nzambì wa Cyendèlèlè, ne wàkabiìsha mubidi Wèndè Sungasunga ku lufù, pa nàнку Yèyè m'Mubingishi.

<sup>87</sup> Mpindyewu, bintu byònsò ebi: “Tùyaayi kumpàla too ne ku bupwàngàne,” mùdi Pòlò mwambè. Mpindyewu ncinyi?

*... byà dilumbulwisha dya cyendèlèlè.*

*... eci twètù netúcyěnzè, ... Nzambì mwanyishe.*  
(mvnsà mwi3.)

<sup>88</sup> Mpindyewu: “Kuya kumpàla too ne ku bupwàngàne.” Yesù wàkamba ne: “Ki bwà cinyi ikàlaayi bapwàngàne, ànu mùdi Taatù wenù mu Dyulu mupwàngàne.”

Nènku twètù, muntu ne muntu, tudi bapiìshìibwe. Citùdiku twenza nànsha ciikàle cinyi, tudi bapiìshìibwe. Tudi balela, bapiìshìibwe. Mamwèbè ne tatwèbè bàvwa balela, bapiìshìibwe. Bèèbè, bankambwà bèèbè bònsò bàvwa balela mu mpèkaatù, bafwimba mu bubì. Pa nàнку mmunyì muwìkalàku mwa kubùpeta? Mmunyì muwìkalà mupwàngàne? Pawìkalà kacya

kùyikù mwenzè cintu, kùyikù mwibè, kuyikù mushimè, kùyikù mwenzè cintu nànsha cimwè kacya bàakulela, udi ànu mupiiishiibwe. Ukaàvwa mupiiishiibwe kumpàlà kwà kweyela mweyelu wèbè wà kumpàla awu. Ukaàvwa mupiiishiibwe. Aci mwômò. Ne ukaàvwa mulumbùlwishiibwe kùdì Nzambì kumpàlà kwà kweyela mweyelu wèbè wà kumpàla awu. Bwalu ukaàvwa mulumbùlwishiibwe, ku dijinga dyà disangila dyà bulùme ne bukàjì dyà tatwèbè ne mamwèbè adi, ku cyenzi cyàbò aci, bakulelè pa buloba apa. Ne Nzambi wàkacipiisha, ku cibangidilu aku. Wèwè udi mupiiishiibwe, ànu kwônso aku. Pa nàнку mpenyi padì. . . Ne muntu mukwàbò yônso pa buloba wàkapiishiibwa pàmwè neebè. Mpindyewu kuwàpetelà bupwàngàne ki kwèpi?

<sup>89</sup> Tàngilàayi. Twánjàayi kubuulula mu Ebèlù ànu bwà katanci kakesè cyanààna, mu nshapità wa 10. Tèèlèjàayi ne ntèmà. Ndi muswè kwanji kubala ndambù mu nshapità wa 9, dyàmbedi, ku mvensà wa 11.

*Kàdi Kilistò mulwè mwakwidi munène wa bintu bimpè bìcivwawà, ku ntentà mutàmbe bunène ne mutàmbe kwikala mupwàngàne, ntentà Wendè Sungasunga, mubidi Wèndè, . . .*

<sup>90</sup> Nwamònu's, ntentà wa kale. . . Nukààvwakù bamòne anyi? Ntentà wa kale awu ùvwa ne cilàmbà-cikùdika munda, cìvwà cisokòke mushèètè wà cipungidi mùvwà Nzambì musòmbèle. Mbanganyi bàdì bamanyè nàнку? Bushùwà's. Èè, ntentà wa kale mwenza ku byanza byà bantu awu, ridò myenza ne bisèbà byà mbùji bilaaba mpençì, ne bikwàbò, bìvwa byenza naabi ntentà bwà kusòkoka Bwikadi bwà Nzambì. Mbanganyi bàdì bamanyè ne ànu muntu umwèpelè nguvwa mwa kubwelamù musangu wùmwèpelè ku cidimu? Cyà bushùwà. Ùvwa ng'Aalònà, ùbwelamù musangu wùmwèpelè ku cidimu. Ne yèyè ùvwa ne cyà kwikala mwediibwe maanyi. Ne—ne, kaa, bìvwà bikengela abi's wè! Ne ùvwa ne cyà kwikala ne kapyà mu cyanza; ne yèyè muyè kàyi naakù to, ùvwa ùfwa pàvwàye ànu ne wàsàki cilàmbà-cikùdika aci paanyimà. Ùvwa mufwanyine kudishinda kufwà. Ùvwa ne cyà kubwelamù ne kuteemesha kapyà ku bitèekedi byà myèndù ebi, ne kumyamina mashi ku nkwasà wa ngàsà cìvwà cyàmba ne, mashi a lufù, cyà mupinganyi aci, too ne pàvwà Kilistò mwà kulwa bwà kucyùja.

<sup>91</sup> Mpindyewu, kàdi, Nzambi dìbà adi wàkalwa mwikàle mu mùshindù mukwàbò wà ntentà. Ne awu ntentà ùvwa Nganyi? Yesù. Ne Nzambi ùvwa munda mwà Yesù, ne Ùvwa musokòme, kàdi Ùvwa munkacì mwà kupungisha bàà pa buloba ne Yèyè mwinè, ku byakwidi Byèndè. Kilistò wàkabuulula Nzambì. Wàkamba ne: “Kì m'Mèmè udi wenza byenzedi to. N'Taatù Wanyi udi musòmbèle munda Mwànyì. Ncyèna ngenza cintu nànsha cimwè mu Mèmè mwinè to ànu cìNdi mmòna Taatù wenza aci. Taatù munda Mwànyì, ùNdeaja bikèènà-kumòna ebi,

pashiishe Nya kenza ànu cidi Taatù muNgambile bwà kwenza aci.” Nwacyùmvù anyi? Nzambi ùvwa munda mwà mubidi wà buntu, kàyi paanyimà pàà bisèbà byà mbùji bilaaba mpenci to, kàdi ùvwa ne mwoyi, ùnyungakana. Nzambi ùvwa ne byanza; Nzambi ùvwa ne makàsà; Nzambi ùvwa ne ludimi; Nzambi ùvwa ne mèsù; ne ùvwa n’Kilistò. Ki Yèyè uvwa mwaba awu awu.

<sup>92</sup> Mpindyewu, Yèyè wàkaya, ne Nyumà wàkabwela mu cyòci aci, bwà ku lufù Lwèndè Wàmòna mwà kupwàngaja Èkèleeziyà ne kuvwija Èkèleeziyà wa ùkòòkela. Ne pashiishe Nyumà umwèumwè uvwa munda mwà Kilistò awu ùdi munda mwà Èkèleeziyà, wenza bintu bimwèbimwè byàkenzà Kilistò abi. “Katanci aka kakesè bàà pa buloba kabààkuMmòna kàbìdi to; kàdi nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà buloba.”

<sup>93</sup> Mpindyewu tèelejààyaaku eci.

*Kàdi Kilistò mwikàle ùlwa mwakwidi munène wa bintu bimpè bìcivwawwà, ku nntentà wa mutàmbe bunène ne mutàmbe kwikala mupwàngàne, kàyi mwenza ne byanza to, mbwena kwamba ne, kàyi wa nzùbu ewu to;*

Kàvwa mwenza ne byanza to. Yèyè wàkalediibwa bìshi? Dilediibwa dyà kùdi virgo.

*Kí nku mashi a mbùji ne a twànà twà ngombe, kùvwà mubidi ewu mulàmbùdiibwe anyi mujidiibwe to, kàdi nku mashi èndè sungasunga. . .*

<sup>94</sup> S’nudi bamanyè ne mashi àdi àfùmina kùdi mubidi wà bulùme. Kàdi pashiishe muntu kampàndà e kwamba ne: “Kaa, Yesù’s ùvwa mwena Yudà.” Yèyè kàvwa mwena Yudà to. “Kaa, twètù’s tudi basùngidiibwe ku mashi a mwena Yudà.” To, kí nnànkù to. Piikalàbi ne tudi basùngidiibwe ku mashi a mwena Yudà, tucidi ànu bajimine.

Yesù kàvwa mwena Yudà, anyi Kàvwa wa bàà Bisàmbà byà bendè to. Ùvwa Nzambi: Nzambi Taatù, Nyumà, Udi kàyi ùmwènèka awu. “Muntu nànsha umwe kàtu mwanji kumòna Nzambi musangu nànsha wùmwè to, kàdi udi mulela umwe kùdi Taatù awu ngudi muMumanyishe.” Yèyè ngwàkamwènesha Nzambi, civwà Nzambi aci.

<sup>95</sup> Mpindyewu Èkèleeziyà Wendè ngudi ne cyà kumwènesha Nzambi, bwà kuleeja cidi Nzambi aci. Nwamònu anyi?

Citùdi twètù twenza ncinyi? Tudyenza malongolodi, ne: “Ncyèna ne cyà dyenza naabò bóbò to. Bóbò mba-Méthodistes. Bóbò mba-Presbytériens. Ncyèna muswè kwikala ne cyà dyenza naabò bóbò to. Mèmè ndi Baptiste. Mèmè ndi mwena Mpenta.” Huh! S’udi mujimine’s, ne tubingilà twà mùshindù awu atu. Bushùwà’s.

<sup>96</sup> Udi mwà kuditàmbisha nganyi? Udi mwa kwamba nì ncinyi cyònsò nganyi? Tàngilàayi numòne bundù bùdi ba-Presbytériens

batwàle. Tàngilàayi numòne bundù, bùdì ba-Baptistes batwàle. Tàngilàayi numòne bundù, bùdì beena Kàtòlikè batwàle. Tàngilàayi numòne bundù, bùdì beena Mpenta batwàle, ba-Nazaréens, ba-Pèlerins de la Sainteté. Tàngilàayi numòne bakwàbò bònso.

Kàdi, mèmè ndi nnwèla kadyòmbò bwà kujuulakù cianza cìmwè, bwà kuleeja bundù, nufunkuna Cyòci aci. Èyowà. Funkunaayikù munu, pàdì Nzambì wa Bukolè bwònsò mwambè apa ne: “Ewu ùdì Mwan’Àanyi munanga mwena munda mùdì mùNsànkisha bwà kusòmbelamù. Mutèèlèjaayi Yèyè.” S’ki Yèyè awu. Mupwàngàne awu’s ki Yèyè awu.

97 Mpndyewu, twánjàayi ànu kuyakù kule ndambù ne kubala mpindyewu.

*Ki nku mashi a mbùji. . . twànà twà ngombe to, kàdi nku mashi èndè sungasunga kùdìye mubwelè musangu wùmhwèpelè mu mwaba wà cijila, mwikàle mutùpetèle bupikudi bwà cyendèlèlè. . . (Nudi bacyümvwè anyi?) . . . bupikudi bwà cyendèlèlè.*

98 Kí nkupikudiibwa leelù, ne pashiishe, lumingu lwàlondà pààbangà ditàbuluja, kupikudiibwa cyàkàbìdì, ne pashiishe, kaa, tutwà cìmpìngà kàdi kupikudiibwa cyàkàbìdì. Nudi bapikùdiiibwe musangu wùmhwèpelè, bwà kashidi. Ncyà bushùwà. Kabicyèna cyàkàbìdì byà kupikula, kupikula, kupikula nànsha. “Bupikudi bwà Cyendèlèlè!” “Ewu udi utèèleja Mèyi Àanyi ne wìtabuuja Yèyè udi muNtùme, ùdì ne Mwoyi wà Cyendèlèlè, ne kàakupicilakù ku cilumbulwidi to, kàdi ùkaadi,” cikondo cipìte, “muumùke ku lufù muyè ku Mwoyi.” Mbwalu wàzakàdì anyi? Mbwalu wàbàtìijiiibu mu mùshindù kampànda anyi? Mbwalu ùvwa ne mashi mu cianza anyi? “Mbwalu wìtábùùjì Mwànà mulela umwe wa Nzambì.” Mùshindù awu ngutùdì ne bupikudi bwà Cyendèlèlè.

99 Tèèlèjàayaaku mpindyewu.

*Bwalu. . . mashi a bimpàngà byà ngombe ne a mbùji, ne butù bwà ngombe yà nkùngùlù mamyamina pa—pa. . . kumyamina bàdì bakooyike, àdì àjidila too ne ku dikezula dya mubidi:*

*Ambààyaaku tìng mwàbèngà mashi a Kilistò, yèyè udi ku Nyumà wa cyendèlèlè mudìlambùle yèyè mwinè kàyi katobà kùdì Nzambi, kukezula kondò kèètù kàà mwoyi ku midìmu mifwè bwà kukwàcila Nzambi udi ne mwoyi mudìmu?*

100 “Muumùke ku lufù muyè ku Mwoyi.” Cyùdì utàcishila meeji bwà cìdì bàà pa buloba bèèla meeji ncinyi? Cyùdì utàcishila meeji bwà cìdì mwena mutumba neebè wèla meeji ncinyi? Dyètù dìjinga dikaadi difwè, ne tukàadi bafùkulula ne balediiibwe cyàkàbìdì ku Nyumà wa Nzambì, bwà kukwàcila Nzambi mulelèlè ne udi ne mwoyi mudìmu. Ki bwalu mbwabù.

101 Mpindyewu pitaayi ku mvensà wa 10, nshapità wa 10's wè, ànu ku luseke lukwàbò lwà dibèji alu.

... *mikenji miikàle ne mundidimbi wà bintu bîmpè bicivwawwà, kàdi kaciyi cimfwányi cyà bintu biinè to, ne milàmbù yà mashi yìvwàbo balàmbula ku cidimu ku cidimu misangu yònsò ayi kayèenakù mwà kuvwija ewu udi ulwa m-u-p-w-à-n-g-à-n-e to.*

M-u-p-w-à-n-g-à-n-e, ki cidi mwaba awu: “Mupwàngàne.”

... *tushìya maalu a ku cibangidilu a dilongesha dyà Kilistò, tùyaayi kumpàla too ne ku bupwàngàne, . . .*

*Ki bwà cinyi ikàlaayi bapwàngàne, ànu mùdì Taatù wenù. . . mu dyulu mupwàngàne amu.*

102 “Mikenji miikàle ne mundidimbi wà bintu bîmpè bicivwawwà,” mèyì ònsò ne mabàtiiza ne... bintu bikwàbò byònsò bivwàbo naabi abi, “kabivwakù mwà kuvwija mukuukwidi mupwàngàne to.” Kàdi, pààbi's, Nzambi ùdi ùlòmba “bupwàngàne.”

103 Wèwè uya kashàala wa mu èkèleeziyà wa ba-Nazaréens, kacýàdyàkukuvwijakù mupwàngàne to. Wèwè uya kashàala wa mu èkèleeziyà wa ba-Baptistes, wa Mpenta, cyònsò cidiku aci, kacýàdyàkukuvwijakù mupwàngàne to. Wèwè mwikàle muntu mwîmpè, wa lulamatu, kacýàdyàkukuvwijakù mupwàngàne to. Kwèna mwa kukùmbanyinakù cintu nànsha cimwè to. Kakwèna cintu nànsha cimwè kùdi aku to, cidi mwà kukùmbanyina. Wèwè udi mujimine. Wèwè udi wamba ne: “Ee, ntu mulamè mikenji. Ntu nneemekela nsabatu. Ntu nneemekela *cikampànda*, mèyì ònsò a Nzambi. Ntu genza *cikansanga*.”

104 Pòlò mmwambè ne: “Tùteekàayi ku luseke bintu byònsò abi mpindyewu.”

105 “Abi mbîmpè, kàdi's netwènzè *cikampànda*. S'netùbatiizè bantu, ne netùbàtentèkèlè byanza bwà dyondopiibwa dyàbò ne bikwàbò.”

106 Tudi bafwányine kucyàngata, ku mvensà ku mvensà, cyònsò cyà ku byòbi bintu abi. Dibàtiiza, tudi tudìtabuuja. “Kùdi ditèkemena òmwèpelè, Mukalenge umwèpelè, Diitabuuja òmwèpelè, Dibàtiiza òmwèpelè.” Tudi twitabuuja ne kùdi dibàtiiza kampànda. Tudi twitabuuja dibìikà dyà bafwè. Kakùyì mpatà to. Tudi twitabuuja ne Yesù wàkafwà ne wàkabìika ku lufù. Tudi twitabuuja aci. “Ditentekelangana dyà byanza, bwà babèèdì,” ki cidici cyambè. “Bimanyinu ebi nebifilè bàdi biitabuuja. Bòbò batentèkèle babèèdì byanza, babèèdì nebàsangalè.” Tudi twitabuuja aci.

Kàdi ncinyi aci? Pòlò mmwambè ne: “Byònsò abi mmidimu mifwè.” Ncintu kampànda cyùdi wèwè wenza's.

107 “Mpindyewu tùyaayi kumpàla too ne ku bupwàngàne.” Kaa, èkèlekèle! Tudi tubwela mu Ntentà awu, kí mmu cishìmikidi

to; Ntentà, Ntentà Yèyè mwinè. Ki cishimikidi ncyôci aci: mikenji, ne bwakàne, ne—ne—ne—ne diya kashàala wa mu èkèleeziyà kampànda, ne kubàtijiibwa, ne—ne ditentekelangana dyà byanza. Ônsò awu mmèyì matùma a èkèleeziyà.

“Kàdi mpindyewu tubwelàayi mu bupwàngàne.” Ne kùdi ànu Umwèpelè udi mupwàngàja, n’Yesù.

<sup>108</sup> Tudi tubwela munda Mwèndè munyi? “Ku ba-Méthodistes” anyi? To. “Ku bwena Mpenta” anyi? To. “Bu-Baptiste” anyi? To. “Ku èkèleeziyà kanà yònsò ewu” anyi? To. “Kàtòlikè wa cyena Loomò” anyi? To.

<sup>109</sup> Tudi tubwelaMù munyi? Loomò 8.1.

*Ki bwà cinyi kakwèna mpindyewu dipiila nànsha dikesè bwà aba bàdi munda mwà Kilistò to...bàdi kabayi bènda bilondèshile bintu byà pa buloba, bya mubidi to, kàdi bilondèshile bintu byà Nyumà, bàdi kabayi bàtèya ntèmà ku bìdi bàà pa buloba bàmba to.*

<sup>110</sup> Nànsha wèwè usaama, ngàngàbukà wàmba ne: “Ufwàfwa,” kwèna wèwè utèyakù ntèmà to, kacyèna cikutàcishakù to nànsha kakesè.

<sup>111</sup> Bòbò bàkwambila ne: “Bìdi bikèngela bwà ùlwe mwena Kàtòlikè kumpàlà kwà wèwè kusùngidiibwa, anyi Presbytérien, anyi wènzè cikampànda,” wèwè kwèna utèyakù ntèmà to.

“Ki bwà cinyi kakwèna dipiila bwà aba bàdi munda mwà Kilistò Yesù to, aba bàdi kabayi bènda bilondèshile mubidi, bintu bìdibo bàmona to.” Byònsò byùdi umòna ne mèsù èbè abi mbyà pa buloba.

<sup>112</sup> Kàdi mbintu byùdi umòna mu nyumà webè, umwèna ku Dìyì! Dìyì ki dìdi lumwènù lwà Nzambi lùdi lùleejà cidiYe Yèyè ne cyùdi wèwè. Àlèluuyàh! Kaa, ekèlekèle! Dyòdi ndidì dikwambila. Ewu ki Mukàndà wùmwèpelè pa buloba wùdi wùkwambila kùdi mufùme, cyùdi, ne kúyaayà. Ndeejaàyikù dibèji nànsha dimwè dyà bìdi bifùnda, mwaba nànsha wùmwè, ne maalu a mamanya ònsò anyi nì ncinyi cikhwàbò, mukàndà wònsò mwimpè wùdi mufùnda, nànsha wùmwè wa ku yòyi kawèna mwà kukwambila aci to. *Elu* ki lumwènù lwà Nzambi, lùdi lùleejà cidiYe Yèyè ne cyùdi wèwè. Pashiishe, munkaci amu mùdi mushoonyi wà Mashì, wùdi wùleejà cyùdi mwà kwikalà paùdi muswè kwenza disungula. Ki bwalu mbwòbù abu.

<sup>113</sup> “Ku Nyumà umwe,” mpindyewu, Kolintò wa Kumpàla 12. Tudi tubwela mu Mubidi awu bishi?

“Ku dilabulangana dyà ku cyanza anyi?” To, mukalenge. “Ku diya kashàala wa mu èkèleeziyà anyi?” To, mukalenge. “Ku dibàtijiibwa cyàdi muulu, cyàdi panshi anyi? Mu dìnà dyà Taatù, Mwànà, ne Nyumà Mwimpè anyi? Mu Dìnà dya Yesù Kilistò anyi? Mu dìnà dyà Rose wa Shaalònà, Mbata wa mu Cibanda, Mùtootò wa mu Dindà anyi? Cyònsò cyùdi muswè anyi?”

Aci kacyènamù ne cyà dyenza to. “Ànu dyandamuna cyanààna dyà kondò kàà mwoyi kimpè kumpàlà kwà Nzambi.” Kàdi pèètù’s tudi tukòkangana, ne tubinduluka, ne tukòkangana, ne tutàpululangana, ne twenzangana tulumbùlumbù. S’ncyà bushùwà. “Kàdi byònsò abi mmidimu mifwè.” Twètù tuyààya batàngile ku bupwàngàne.

114 Abi mbintu bìndi mèmè mwenzè. Mwambi mmukubàtìize. Nànsha yèyè mukubàtìize cyàdi panshi, cyàdi muulu, anyi misangu yisàtù, misangu yinaayi, anyi musangu wùmwe, anyi mwònsò mùdiye mucyènzè amu, abi kabyènaMù ne bwalu to. Cyùdi wèwè udi mubàtìijìibwe ànu mu bwobùmwe bwà èkèleeziyà awu cyanààna’s, twamb’eku twamb’eku, mwikàle ujaadikila èkèleeziyà awu ne: udi witabuuja lufù, dijiikiibwa, ne dibìikà dyà ku lufù dyà Kilstò. Ditentekelangana dyà byanza, bwà kwondopa babèedi, s’mbilenga be, kàdi, bìdi byònsò byà mu mubidi, kàdi mubidi awu newùfwe cyàkàbidi cyà bushùwà ànu mùdi ne mwoyi amu. Wòwù newùfwe cyàkàbidi. “Mpindyewu tuteekàayi ku luseke bintu byònsò abi, ne tuyaayi kumpàla too ne ku bupwàngàne.”

115 Tudi tukafika ku bupwàngàne munyi? Ki citùdi baswè kumanya ncyòci aci.

. . . Kilstò. . . *mmupwàngàje*.

“Nzambi wàkatèeka pambidi Pèndè bubi bwètù twètù bònsò. Wàkatàpiibwa mpùtà bwà dishipa dyètù dyà mikenji, muzaajiibwe bwà bubi bwètù, dinyooka bwà ditalala dyètù dyàkapòna pambidi Pèndè, ku mibùndàbùndà Yèndè twètù twàkondopiibwa.” Ki Mubidi ngwòwù awu kutùdi baswè kuya kafika. Ki Mubidi ngwòwù awu. Bwà cinyi? Wèwè mu Mubidi awu, kwàkumònakù cilumbulwidi to, kwàkulabulakù lufù to. Udi musùlùdiibwe ku lufù lwònsò, ku cilumbulwidi, ku mpèkaatù, ne ku bikwàbò byònsò, paùdi mu Mubidi awu.

116 “Udi ubwelaMù bishi’s, muyiishi wa yààya? Mpa kushààla wa mu tabernale ewu anyi?” Wèwè uci di ànu mujimìne, nànsha nànkù. Kwèna mwa kashààla wa mwómò to, wèwè mwinè; twètù katwèna ne mukàndà wà mènà nànsha wùmwe to. “Tudi tubwelaMù munyi? Mpa kuya kashààla wa mu èkèleeziyà kampànda anyi?” To, mukalenge. “Udi ubwelaMù munyi?” Udi ulediibwaMù.

117 Kolintò wa Kumpàla 12.

*Bwalu ku Nyumà umwe nkutùdi bònsò babàtìijìibwe mu mubidi wùmwe, . . .*

118 Ku dibàtiiza dyà Nyumà Mwímpè, nkutùdi babàtìijìibwe mu Mubidi awu, ne basùludiibwe ku mpèkaatù. Nzambi kacyèna ùkumòna wèwè kabidi to; Ûdi ùmòna ànu Kilstò. Nènku paùdi mu Mubidi awu, Nzambi kèna mwà kulumbulwisha Mubidi awu to. Yèyè ùkaadi mumanè kuWùlumbulwisha. Mmwangàte manyooka ètù ne mutùbìikile bwà kubwela. Nènku tudi twenda



ku diitabuuja, ku ngàsà, ne twitaba difwidiibwa dyètù dyà luse. Nènku Nyumà Mwimpè ùdi ùtùbweja mu bwobùmwe Nendè ebu. “Nènku katùcyèna kàbidì twenda bilondèshile bintu byà pa buloba to, kàdi tudi twenda mu Nyumà.”

Bafùùlulula, Dìyì ndilwè kutùdi. Yèyè wàkafwà pa kaaba kàànyì. Ndi muvwijìibwe ne mwoyi. S’ki mèmè ewu, uvwa mufwè mu mpèkaatù ne matomboka awu, nkaàdi muvwijìibwe ne mwoyi. Majinga àànyì ónsò ngàà kuMukwàcila Yèyè mudimu. Dyànyì dinanga dyònsò dìdi kùdiYe Yèyè. Kwànyì kwenda kwònsò ndi muswè kwikalè mu Dìna Dyèndè, bwà kwònsò kùnyaayà, cyònsò cìndi ngenza, ngùikalè mMutumbisha Yèyè. Mèmè ndemba nyama, mème ndòba mishipa, mèmè nnàya ndundu, mèmè—mèmè...cyònsò cìndi ngenza, ndi ne cyà kwikala ne: “Kilistò munda mwànyì,” mu nsòmbelu wa ne, cifikishè bantu ku kujinga kwikala mùshindù awu; kì ndilòlà dyà myandà, kì ndilondelangana dyà maalu mabi a bakwàbò, ne dikòkangana pa maèkèleeziyà ènù to. Nwacyùmvù anyi?

“Ku Nyuma umwe nkutùdi babàtìijìibwe mu Mubidi awu.”  
“Ne pàNgààmònà Mashi, Nèmpitè kumutù kwènù.”

<sup>119</sup> Tèèlejààyi. Tùbalààyikù ànu too ne kumpàla aku, bu nwènù mwa kuswà.

...cìdì kacìyikù mwà *kuvwija* udi ulwa awu *mupwàngàne* to.

“Bwalu...” mvensà mwi2, nshapìtà wa 10.

*Bwalu dìbà adi bòbò kabàvwa bafwànyine kwikala balekèle bwà kuyilàmbulà’s?*

<sup>120</sup> Bu ne cyòci aci civwakù mwà kuvwija muntu mupwàngàne...Pààbì’s Nzambi ùdi ùlòmba bupwàngàne. Kulama kwà mikenji, kwenza kwà mèyì ónsò matùma awu, bu ne bìvwa mwà kukuvwija mupwàngàne, dìbà adi kabyèna—kabyèna bikèngela bwà kwikala ne cikwàbò cintu to; wèwè s’nyawu ukààdi mumanè kuvwijìibwa mupwàngàne. Bwalu, paùdi mupwàngàne, udi wa Cyendèlèlèlè. Bwalu, Nzambi ngudi Umwèpèlè udi wa Cyendèlèlèlè, ne Nzambi ngudi Umwèpèlè udi mupwàngàne. Ne mùshindù wùmwèpèlè wùdiku mwà kwikala wa Cyendèlèlèlè, ngwà kulwa citùpà cyà Nzambi. [Katùpà kàà mukàbà wà mèyì munda mutupù—Muf.]

...pàdìbì ànu ne wàkezùdìbù kabìvwa bikèngela bwà *kwikalayè*...kàbidì ne *civùlukilu* cyà mpèkaatù to.

Cinyì? “Mukuukwidi pàdiye ànu ne wàkezùdìbù, bwà kubènga kwikala kàbidì ne *civùlukilu*...” Wèwè mufunde dikùdimuna dyà cyòci aci, n’“dijinga.”

...yèyè mukuukwidi pàdiye ànu ne wàkezùdìbù...  
kèna kàbidì ne dijinga dyà mpèkaatù to.

...mukuukwidi yèyè pàvwaye ànu ne  
wàkezùdìbù...

121 Udi useemena kumpàla mpindyewu wamba ne: “Kaa, àlèluuyàh, ngàsungidiibu makeèlèlè dilòlò awu. Kàdi, èè, Nzambi àbeneshiibwè, mukàji ewu mmumfikishe ku ditwà dyà cimpingà. Àlèluuyàh, dīngà ditùkù nēnsungidiibwè cyākàbìdì.” Mupangi wa mukàndà mukwàte ne byà luse kàyi mulongesha naanyi we. Awu kī mmùshindù wùdìbi nànsha.

122 “Mukuukwidi pàdiye ànu ne wàkezùdiibù kēna kàbìdì ne civùlukilu cyà mpèkaatù to,” mùdì Bible mwambè. Tèèlejaayi, patùdì tutungunuka ne kubala apa, katanci kakesè cyanààna.

*Kàdi mu yòyi milàmbù ayi...mpèkaatù ùvwà ùvùlukiibwa ku cidimu ne ku cidimu.*

123 Mpindyewu netùpwekè ne kubala, bwà kufika lwà ku mvensà wa 8, bwà kulaminyina dībà, ne mwaba wùndì muswè kafika awu.

*Kumutù aku dībà adi pààkambàye ne: Mulàmbù wà mashi ne milàmbù ne milàmbù ya dyosha...bwà mpèkaatù kwēna muswè to, ne wēwè kwàkasànka bwà byòbì abi to; bidìbo bàlàmbula bilondèshìle mikenji abi;*

124 Mvensà wa 9.

*Pashùshe kwambayè ne: Mòna, Ndi ndwa bwà kwenza diswa dyèbè, Èyi Nzambi. Yèyè ùdi ùmusha... wàngata... Yèyè ùdi ùmusha cyà kumpàla, mikenji, bwà wàmòna mwà kutèeka ciibìdì.*

125 Ndi njinga bwà twìkalakù ne dībà bwà kushààla pa cyòci aci. Paùcidi ànu Presbytérien, anyi mwena Mpenta, anyi Baptiste, anyi Méthodiste, Yèyè kēna mwà kwenzakù neebè cintu nànsha cīmwè to. Bikèngela Yèyè ànji kuumusha cyònsò aci, cyà kumpàla aci, nwamònu’s, bwà kumònaYè mwà kutèeka ciibìdì. Paùcidi ànu wamba ne: “Èè, mēmè ndi Méthodiste.” Aa, ncyēna cilumbù ne ba-Méthodistes, anyi ba-Baptistes, anyi beena Mpenta to. Kàdi, mwanèètù, kī ng’aci—kī ng’aci cìdici cìswa kwamba to. Bikèngela ùye kumpàla too ne ku bupwàngane, mbwena kwamba ne kubwela mu Kilistò.

126 Tàngilàayi eci mpindyewu, ànu katanci kakesè cyanààna.

*Ku cyòci eci...tudi bajidiibwe ku mulàmbù wà mubidi wà Yesù Kilistò musangu wùmwe cyendèlèlèlè.*

127 Huh? Twánjàayi ànu kubalakù kàbìdì ndambù, kàdi nùkwatàayi aci. Lekèlaayi aci cinùbwelèku patùcidi tubala ne: “Musangu wùmwe cyendèlèlèlè” apa.

*Ne mwakwidi yònsò udi wimana ku ditùkù ne ku ditùkù wènza mudimu wèndè ne ùfìla misangu yàbùngì mulàmbù wùmwe wùmwe awu, wùdì kawùyikù mwà kuumusha mpèkaatù to;*

*Kàdi ewu muntu yèyè,...*

Nudikù anyi? Mpindyewu nudi balamè maci ènù mabàwula anyi, bwà kaciikadi cyàlwa kuya ku luseke, bwà ciye buludi mu mwoyi? “Kàdi ewu Muntu Yéyè.” Muntu kaayi? Kî mpaapà wa ku Loomò to, kî mmwèpiskòpò wa èkèleeziyà wa ba-Méthodistes, anyi wa èkèleeziyà kampànda kanà yònsò ewu to.

*Kàdi ewu muntu yéyè, Kelistò, paanyimà pàà mumanè kufila mulàmbù wùmwe bwà mpèkaatù bwà kashidi, wàkasòmba ku dyàbalùmè dyà Nzambi;*

*Kubangila apu kushàalayè mwindile too ne pìikalà beena lukunà bèndè bavwijùbwe citèèkedi cyà makàsà èndè.*

Tàngilàayi. Ki cyôci cilwalwà eci.

*Bwalu ku mulàmbù wùmwepele yéyè wàmanyi k-u-p-w-à-n-g-a-j-a, yéyè wàmanyi kupwàngaja . . .*

“Too ne ku ditàbuluja didi dilondà” anyi? Ncyambè cinyi?

*. . . yéyè wàmanyi kupwàngaja bwà kashidi aba bàdi bajidiibwe.*

Nwacyũmvù anyi? “Tùyaayi kumpàla too ne ku bupwàngàne.”

<sup>128</sup> Mpindyewu nwènù beena cijila nudi nwamba ne: “Kaa, èyowà, twètù tudi twitabuuja cijila. Alèluuyàh! Tudi twitabuuja dijidiibwa.” Kàdi wèwè udi udyàngacila dyèbè dyà sungasunga. Udi ànu ulekela *cikampànda* ne ulekela *cikansanga*. Udi mumanyè ne kî ncivwà cikèngelà wèwè kwenza to.

Ambà ànu Kelistò mukàngule ciibi ne mucivwijè ne mwoyi munda mwà mwoyi wèbè, ne wèwè mulwè mwaba wùdi mpèkaatù mufwè, ne dijinga, byònsò biyè's. Dìbà adi, Yéyè ùdi ùmusha bwakànè bwèbè wèwè abu, Ùdi mwa kuDitèeka Yéyè mwinè munda mwèbè. “Nènku n’Kelistò, Mwànà wa Nzambi, munda mwèbè, ditèkemena dyà Butumbi.”

*. . . tùyaayi kumpàla too ne ku bupwàngàne,*

<sup>129</sup> Tudi mwà kwikala bapwàngàne munyi? Ku lufù lwà Kelistò. Kî nku diya kashàala wa mu èkèleeziyà to. Kî nku byenzedi byètù bìmpè, bitùdi twenza to. Byònsò abi bìdi ànu bìmpè. Kî mbwalu tuvwa babàtùijibwe mu mùshindù *kampànda* anyi mu mùshindù *kansanga* to. Kî mbwalu tudi bondòpiibwe, ku ditùtentekela dyà byanza to. Kî mbwà ní ncinyi cyà ku bikwàbò bintu ebi byà ne: “Tudi twitabuuja lufù, dijiikiibwa, ne dibùikà dyà ku lufù” to.

<sup>130</sup> Pòlò mmwambè ne: “Ndi mufwànyine kwakula mu myakulu mùdi bantu ne Banjèlo,” mmùmwe ne mmyakulu yònsò, yidìbo bùmva ne yidìbo kabàyi mwà kuumvwa, yikèngela kwandamuna, “ndi cintu cyanàànà. Nànsha mèmè ne dipà dya dimanya ne dyà kuumvwa lungènyì lwònsò lwà Nzambi,” mwikàle mwà kuumvwija Bible, kuumukila ku. . . kumutwàngaja yònsò, “ndi cintu cyanàànà.” Dìbà adi kabyèna ne dikwàcisha dyàbùngi bwà kuya ku kàlaasà to, s’mmwòmò's,

bwà kulonga Bible? “Nànsha mémè ne diitabuuya dyà mémè mwà kutentemuna mikùnà...” Tùmpanyè twà dyondopa dîbà adi katwèna ne cidìtu twàmba to, mmwômò anyi? “Ndi cintu cyanàànà. Nànsha mémè mfla mubidi wànyì bwà kwoshiibwawù bu mulàmbù.”

131 “Kaa,” mùdìbo bàmba, “wàwa muntu’s mmutèndeleeedi.”

132 “Kàdi’s ùdi cintu cyanàànà,” mùdi Pólò mwambè, “kacya kàtukù ne cidìye mulwè to.”

133 “Bwalu mwaba wùdi myakulu, neyìimanè; mwaba wùdi bipròfetà, nebìpangilè bwalu; mwaba wùdi bikwàbò bintu byònsò ebi, nebìpangilè bwalu. Kàdi piikallà cidì cipwàngàne cilwè, cidì cyà citùpà neciìmanyikiibwè.” Nwamònu’s, “cipwàngàne” aci. Cipwàngàne ncinyi? Dinanga. Dinanga ncinyi? Nzambi. “Tùteekàayi ku luseke tuumidimu twònsò twà tukesè tufwè etu ne mèyi matùma, kàdi tùyaayi kumpàla too ne ku bupwàngàne.” Nudi bacimòne anyi? Tudi bapwàngajila mu Kilisto. Tudi tubwelaMù munyi? Ku dibàtiiza dyà Nyumà Mwímpè.

134 “Èyo, cidì cyènzekà ncinyi?” Udi muumùke ku lufù muyè ku Mwoyi.

135 “Èè, ndi nzakala, ntùpika, mbyènza anyi?” Kabyèna—kabyàkukèngela bwà wèwè kwenza cintu nànsha cìmwè to. Wèwè’s ukàadi mumanè kubyènza, Nzambi’s ùkaadi mukuumùshe ku lufù mukufikishe ku Mwoyi, ne wèwè’s udi ne mwoyi. Dîbà adi mamuma a nsòmbelu webè’s àdi àcìleeja.

136 Bààbùngì bàà kunùdi nwènù ba-Méthodistes ne ba-Nzaréens nukaàdi beelèèle mbilà mikolè ne mwènù mwònsò, kàdi nwiba matalà mu kaabudimi kàà bendè, ncyà bushùwà’s, nwenza byònsò bìdi bifwànyìne kwenjiibwa abi.

137 Bààbùngì bàà kunùdi nwènù beena Mpenta’s nukaàdi baakùlàakùle mu myakulu, byenzè bu bàdi bàpòngolola nkùnde pa cisèbà cyà ngombe, bushùwà’s, upàtuka buludì ukanyeema ne mukàjì wa mwena mutumba, nwenza bintu byà mishindù yònsò. Awu kí n’Yèyè to, mwanèètù.

138 Kùkèbi bwà kupeta disaluka anyi cintu kampàndà bwà kwangataci kaaba kàà Nyumà Mwímpè to. Pàdi Dilediibwa dipyàdipyà dilwa, udi ushintuluka. Kabyèna bikèngela bwà wèwè kwenza ní ncinyi ní ncinyi bwà kucijaadika to. Nsòmbelu webè ngudi ucijaadika, mu lwendu lùdi wenda alu. Udi dinanga, ditalala, mwoyi mule, musànggeelu, bupòle, lutùlù. Ki cyùdi ncyòci aci, ne bàà pa buloba bujimà bàdi bàmòna dileejiibwa dyà Yesù Kilisto mu wèwè.

139 Mpindyewu, kwakula kwà mu myakulu, kwela kwà mbilà muntwamu, abi mbyambiibwà cyanàànà bìdi bìshindikijà Mwoyi wà mùshindù ewu ewu.

Kàdi udi mwà kwàngata, kutentula byòbi byambiibwà abi, kàdi kùyikù ne Mwoyi awu to. Tutu tucimòna. Mbanganyi bàdi bamanyè aci ne ncyà bushùwà? Bushùwà, nudi bamanyè. Ncyà bushùwà ne nudi bamanyè. Ekèlekèle! Nutu nucimòna mu nyungulukilu wenù yònsò amu.

<sup>140</sup> Pa nàнку, kakwèna cintu cyùdiku mwà kwamba ne ki cileejy cyà Nyumà Mwímpè to, pa kuumusha ànu nsòmbelu ùdi nendè awu. Mpindyewu, wèwè muswè kwakula mu myakulu, abi mbímpè menemene pawikalà ne nsòmbelu udi ucitwa nyama ku mikòlò. Ncyà bushùwà. Ne wèwè muswè kwela mbilà, mbilenga, abi mbimpè. Mémè ntu pàanyi ngeela mbilà, mpeta disànka mîngà misangu mu mùshindù wà bînkolela bwà kushààla muvwàle bisàbaatà; ntu muswè kutùpika kubishiya panshi. Nènku aci ncilenga be. Mémè ntu nciitabuujja.

<sup>141</sup> Nkàadi mumònèmòne bikèènà-kumòna, ne babèèdi bondòpiibwe, ne bafwè babiike. Pàdìbo balàadika mwaba awu ne bangàngàbukà bùùmuka bàmba ne: “Kwèndè nkujikè ne mmumanè kufwà,” mulàadika mwaba awu ndambù wa mèbà, kàdi Nyumà Mwímpè upweka buludi ùleeja cikèènà-kumòna, ùya mwaba awu ùjuula muntu awu. Nkàadikù mumòne aba bàvwà bampudimaci, tumàmà, ne mpofo, ne bikalàbà, bèndela kuulu. Aci kî ncidi . . . Abi bìdi ànu byambiibwà cyanàànà.

<sup>142</sup> Mwanèètù, kùkaadi ntàntà mule, kumpàlà kwà dyulu ne buloba kabiyikù byanji kupeta cishimikidi to, Nzambi ku ngàsà Wende wa Cyendèlèlè, kutàngilaYè panshi, ne ku didyànjila-kumanya kutùmònaYè mémè ne wèwè. Ûvwa mumanyè ne mmu cikondo kaayi mutùvwà mwà kusanganyiibwa. Ûvwa mumanyè citùvwà mwà kwikalangana. Ki bwà cinyi, ku disungula, Yèyè kutùsungula kumpàlà kwà difùkà dyà dyulu ne buloba, bwà twètù kwikala Nendè katùyi katobà to.

<sup>143</sup> Mpindyewu, piikalàbi ne Yèyè wàkatùsungula kumpàlà kwà difùkà dyà dyulu ne buloba bwà twètù kwikala Nendè katùyi katobà, kàdi twètù kulediibwa ne matobà pambidi pajimà, ne cintu cikwàbò nànsha cimwè kaciyikù mwà . . . cintu nànsha cimwè kaciyikù mwà kutùkezula, mmunyi mutwikalàku katùyi—mmunyi mutwikalà katùyi katobà? “KutùmaYè Mwan’Èndè umwèpelè mulela, bwà ne ewu yònsò udi uMwitabuujja kàpecikù ndekeelu wa mwoyi nànsha, kàdi ikalè ne Mwoyi wà Cyendèlèlè; bwà kàbütuku to, kàdi ikalè ne Mwoyi wà Cyendèlèlè.” Dìbà adi patùdi tubwela munda Mwèndè, ku diitabuujja, ku ngàsà nkutùdi tusungidiibwa, kùdi Nyumà Mwímpè mwikalè ùtùbiikila.

<sup>144</sup> Kumpàlà kwà kwikalakù mubidi kampànda pa buloba ebu, mibidi yènù yivwa yisanganyiibwa mwab’ewu. Mmwenza ne kàlisiyumù, binshidimba, mutaleela, bukènkè bwà mu cibwàshibwàshì—bwà mu cibwàshibwàshì, ne mpiitùloolù, ne bikwàbò, bintu dikùmi ne bisambòmbò. Ki Nyumà Mwímpè kubangaYè kulàadila buloba, “ùbwàmbisha.” Ne pààkenzàYè

nànkù, katanci aka, kutòlokakù kaacilòngò kakesè kàà Paasàkà. Pashiishe ku dibùlààdila aku kupàtulaYè mashinde, ne tunyuunyi, ne paanyimà pàà mutanci, muntu kupàtukayè.

<sup>145</sup> Mpindyewu, Yèyè kààkenzakù mukàjì ku lupwishi lwà buloba nànsha. Mukàjì úkaavwa mumanè kwikala mulùme, ànu kwìnè kwònsò aku; mulùme ne mukàjì bàdi umwe. Ki kwangataYè mu luseke lwà Adàmà, lubadi, ne kwenzaYè mukàjì, mukwàcishi wendè. Ki pashiishe mpèkaatù kubwelayè. Pashiishe paanyimà pàà mpèkaatù mumanè kubwela . . .

<sup>146</sup> Nzambi kààkucìmunyibwakù to, nànsha cinyi cyenzèke. Yèyè kààkucìmunyibwakù to. Pashiishe, bakàjì kubangabò kulela balùme pa buloba. Ki Nzambi, ku ngàsà wa Cyendèlèlè, kumòna ne nganyi uvwa mwà kusùngidiibwa, ki kukubiikilàYè. “Muntu nànsha umwe kèna mwà kulwa kùNdi, pàdi Taatù Wanyi kàyì mwanjì kumubiikila, dyàmbedi to.” “Kí ng’ewu udi muswè, anyì ewu udi unyeema to, kàdi Nzambi ngudi uleeja luse.”

<sup>147</sup> Wèwè udi wamba ne: “Èè, ntu mukèbe Nzambi. Ntu mukèbe Nzambi.” To, kacya kùtu mukèbekù Nzambi to. Nzambi ngutu mukukèbe wèwè. Ki mùshindù wàkadìbi ku cibangidilu.

<sup>148</sup> Kàvwa ng’Adàmà wàkamba ne: “Éyì Taatù, Taatù, nyewu ngènjì mpèkaatù. Udi penyì?” to.

<sup>149</sup> Taatù ngwàkamba ne: “Éyì Adàmà, Adàmà, udi penyì?” Ki ngiikàdilù wa muntu nyèyè awu. Ki cidì mu muji wa muntu ncyôci aci. Ki cidìye mwenza naaci ncyôci aci.

<sup>150</sup> “Ne muntu nànsha umwe kèna mwà kulwa kùNdi pàdi Taatù kàyì mumukòke to. Ne ewu yònsò udi Taatù ùMpèèsha. . .” Àlèluuyàh! “Ewu yònsò udi ulwa awu, Ndi mmupèèsha Mwoyi wà Cyendèlèlè, ne Nèmmubiishè ku lufù mu ditùkù dyà ndekeelu.” Mulayi mubènesha, mubènesha kaayi’s wè, wà kùdi Nzambi wa mu Dyulu! Mwaba wutùdi tukafika dilòlò edi, wà ne: “Wàkadìcipa ku Yèyè mwinè.” Kakwèna udi mutàmbe bunène nànsha. Wèwè udi wenzela mucipu ku kampànda udi munène mukutàmbe wèwè. Kakwèna udi mutàmbe bunène to, ki Nzambi kwenzelaYè mucipu ku Yèyè mwinè. Tukàadi tubwelamù, mwàkacyènzàYe ne díbà dyàkacyènzàYe; ne wàkenzela mucipu ku Yèyè mwinè ne, Úvwa mwà kutùbiisha twètù aba ku lufù ne kutùvwija bumpyànyì Bwèndè Yèyè mwinè.

<sup>151</sup> Kaa, mùshindù mwinè wutùdiku mwà kwimana bapwàngàne ne bashindàme, mu dindà emu’s wè! Mùdi mwà kutàngila, bu lufù mwà kukutàngila buludì mumpàla, udi mufwànyine kwamba bu Pòlò ne: “Lufù, kalonda kèbè kàdi penyì? Lukità, buci munyi bwèbè bùdi penyì? Kàdi twasàkidila kùdi Nzambi, Yèyè udi utùpèèshila buci munyi ku Mukalenge wetù Yesù Kilistò.” Ki bwalu mbwòbù abu’s. Bwà cinyì?

<sup>152</sup> “Kaa, wèwè’s wàkenza *cikampànda-cikansanga*.”

153 “Ndi mumanyè nàнку, kàdi’s ndi mubwikila kùdi Mashi Èndè.” Àlèluuyàh!

154 “Ku Nyumà umwe, nkutùdi bônso babàtìijìbwe mu Mubidi wùmwe.” Nwènu ba-Méthodistes, ba-Baptistes, ba-Presbytériens, cyônso cinùdi, tudi bônso babàtìijìbwe mu Mubidi wùmwe. Tudi mu bwobùmwe, ne tudi beena-mwàbò bàà Bukalenge bwà Nzambi, tujikula, ne: “Katwèna bàà pa buloba ebu to.”

155 Mwanàanyi mukesè wa bakàji kulwayè, ditùku adi, kwambayè ne: “Papa, mwànà mukesè wa bakàji ewu mmwenzè *cikampàndà*. Ne mbenzè *cikansanga*. Tudi bayè kwàbò kumbèlu. Kwenzabò *cikampàndà*.” Mémè ne. . . Yèyè ne: “Twètù mbwà cinyi katwèna twenzakù nàнку?”

156 Mémè ne: “Munanga wanyi, twètù katwèna bàà buloba abu to. Bòbò mbasòmbèle pa buloba bwàbò bòbò.”

157 Yèyè ne: “Katwèna twendela bônso pa buloba bùmwebùmwe ebu anyi?”

158 Mémè ne: “Bòbò mbàà pa buloba, munanga wanyi. Twètù katwèna bàà mu bantu abu to.”

159 Bible mmwambè ne: “Pàtukàayi munkaci mwàbò, nùtapulukè, mùdi Nzambi wàmba.” Nwamònu’s, nwènu kanwèna bàà ku cyòci aci to. Nèнку pàdi Ngiikàdilù mupyamùpyà awu ùbwela munda mwèbè, kabyèna bìkèngela bwà kukukòka bwà kukupàtula to. Kwèna muswè bwà kwalukila cyànyimà to, bu mukàji wa Lotà. Wèwè wafùmu ku diledibwa, mupàtùkemù. Ne wèwè udi mu cipaapu cikwàbò. Ne aci cidi cimwèka cyà bukooyà kùdi.

Ne Àmèrikè ewu, munène, mulenga wa dikèma mutùdi basòmbèle ewu, mmulwè cimvundù cinène cyà byòbi abi. Byònsò bikaadi ànu dyalakana ne bakàji. Ne bakàji mùshindù wùdìbo bàvwàla bilàmbà, ne balùme mùshindù wùdìbo bènza maalu, ne—ne bintu bìdìbo bènza, ne pashiishe bàdìbìikila ne, m’“beena Kilistò.”

160 Cileejilu, Elvis Presley ewu, ùya ùkashààla mpindyewu wa mu èkèleeziyà wa beena Mpenta. Mu bushùwà bwà bwalu, ki mwaba wùdi. . . wàkapetelà Yudààsà binjànjà byà mfrangà makùmi àsàtù ngwòwò awu. Elvis mmupetè milongolongo yà tùshinyi twà Cadillacs, ne—ne ndambù wa miliyò yà ndola, ku disùmbisha dyà makenji èndè a bwanààbutè. Arthur Godfrey. Tàngilàayi aci.

161 Tàngilàayi kaaba aka Jimmy Osborne mu Louisville, muntwamu ne bintu byà budìngìdìngì byà mìjikì yà kale yà dizùnzuka, yà bidùndadùnda, yà kale yà bukooya ayi. Kàdi mu dyàlumingu mu dindà, kwambula Bible kwimana mu cyambilu bwà kuyiisha. Bundù kaayi!

Kabyèna bikèmesha to mùdì Bible mwambè ne: “Mèèsà ne mèèsà ònsò mmùle téntè ne bilùshi.” Mòna’s, s’tudi ne mwoyi mu ditùkù dyà dyènza bwôwà!

<sup>162</sup> Ne bantu bàdi bàmba ne: “Kaa, bôbò’s mbatèndeledi bàà dikèma.” Kaa! Kanùtukù bamanyè ne dyabùlù ùtu mutèndeledi anyi? Kanwènaayikù bamanyè ne Kaayinà ùvwa mutèndeledi ànu mùvwa Abèlè amu anyi? Kàdi, kàyi ne Dibuulula to. Ki mùdì bwalu nànkù. Kàvwa yéye ne Dibuulula to.

Èyowà, tuyààya bònsò mu èkèleeziyà, kàdi kùdì bàmwè bàdi ne Mwoyi, bôbò abu mbàdi ne Dibuulula dyà Yesù Kilistò mu mwoyi wàbò. Kí nku dizakala, ditùpika, kí nku diya kashàala wa mu èkèleeziyà nànsha. Kàdi, Dibuulula, Nzambi ngudi muMubuulùle.

<sup>163</sup> Tàngilàayi cyàkambiibwà: “Bantu bàdi bàmba ne Mémè, Mwànà wa muntu, ndi Nganyi?”

<sup>164</sup> “Bàmwè mbambè ne Udi ‘mupròfetà.’ Ne bakwàbò bàdi bàmba ne Udi ‘Eliyà.’ Ne bakwàbò. . .”

Yèyè ne: “Kàdi nwènù nudi nwamba ne nganyi?”

<sup>165</sup> Peetèlò kwambayè ne: “Wèwè udi Kilistò awu, Mwànà wa Nzambi udi ne mwoyi.” Aci kacyàkuumukila ku mishikù yèndè yéye ayi to.

<sup>166</sup> KwambaYè ne: “Udi mubènèshìibwe, Simonà, mwànà wa Yona, bwalu munyìinyi ne mashi kí mbidì bikubuulwilekù eci to. Kacya kùtukù mukalongèle eci mu nsòmbelu kampànda wa—wa bukàlàngà wa Bible, anyi mu sèminèrè kampànda wa tèlòlòjì to. Nudi babènèshìibwe, bwalu munyìinyi ne mashi kí mbidì bikubuulwile eci to. Kàdi Taatù Wanyì udi mu Dyulu ngudi mucibuulùle. Nènku pa lubwebwe elu mpàNgìibakilà Èkèleeziyà Wanyì, ne biibi bya ifèrnò kabyèna mwà kuMutàmba bukòlè to.”

<sup>167</sup> Pawikalà mwena Kilistò, mu dindà emu ne, bwalu udi wa mu èkèleeziyà, udi mujìmine. Pawikalà mwena Kilistò ne bwalu udi muumùke ku lufù muyè ku Mwoyi, udi musùulùdìibwe ku cilumbulwidi; mukwelè mu Kilistò, udi wenda ubwela mu bupwàngàne dìbà dyònsò. Nzambi kèna mwà kumòna cintu nànsha cìmwè to. Wèwè udi wamba ne: “Èè, nèngènzèku cilèma anyi?” Bushùwà’s, kàdi kwèna ucyènza ku bukòlè to.

<sup>168</sup> Mpindyewu tukàadi tubwela mu cyòci aci, ànu mu tusunsa tukesè cyanàànà: “Bwalu ewu udi wenza mpèkaatù ku bukòlè paanyimà pàà yéyè mumanè kupeta dimanya dyà Bulelèlè, kí nkushàale kàbidì mulàmbù wà bubì to.” Tudi tubwela mu cyòci aci dilòlòlò edi, bwalu dìbà ndipìte ndambù mpindyewu.

<sup>169</sup> Twǎnjì túbalàayikù ànu ndambù mukwàbò wa mvensà yà cyòci eci, bwà twamònaku mwà kudyùmwa bilenga pa kwikala bapwekèku kàbidì ndambù. Èyo. Èè, netùbangilè buludì pa aci dilòlòlò edi, mvensà mwi4. Tèelejàayi eci.



*Bwalu kabyèna mwà kwenzekakù to bwà aba bàkaavwà bamana kukenkeshila, ne bavwijùbwe... ne bamanè kwikala... ne balabùle bukolè, mapà a ku dyulu, ne bavwijùbwe baabanyanganyi bàà Nyumà Mwimpè,*

*Ne... balabùle díyì dímpè dyà Nzambì, ne bukolè bwà buloba bùcìvwarwà,*

*Bòbò badishinde, bwà kudyàlujululabò bòbò biinè... ku kanyinganyinga;...*

Nwamònu anyi? Nènku tudi twela aci mu Ebèlù 10, tutwà kumpàla tutwà paanyimà, bwà kuleeja cìdì eci.

<sup>170</sup> Balundà bàànyì: “Tùyaayi kumpàla too ne ku bupwàngàne.” Tudi ne... katwèna... Katwèna ne pàà kubingila leelù ewu to. Katwèna ne pàà kubingila to, nànsha kakesè. Nzambì wa mu Dyulu mmumwènèke mu matùkù a ndekeelu aa ne ùdì munkacì mwà kwenza bintu ànu bìmwebìmwè byàkenzàYe musangu awu, pàvwàYe pànwapa kumpàla abi, pàvwàYe pa buloba apu. Mmujaadike, patùdì munkacì mwà kukenketa mu Bible ewu apa. Ne nwènù—nwènù, kàlaasà, manyààyi eci ne, tudi bangàte cishimà pa cishimà, ne cimanyinu pa cimanyinu, ne bwalu bwà kukèma pa bwalu bwà kukèma, byàkenzàYe ne bânà mu cipèèlà, bintu ne bimanyinu byàkenzàYe abi; bintu byàkenzàYe pàvwàYe pa buloba apa, mumwènèshìibwe mu mubidi apu; ne bintu bìmwebìmwè mene abi bìdì munkacì mwà kwenzeka leelù ewu, munkacì mwètù mene emu. S’n’Diyì edi bwà kucìshìndika. S’ncintu eci bwà kwamba ne ncyà bushùwà, bwà kucìvwija cilelèlà. S’n’Nyumà wa Nzambì ewu bwà kwenza cintu cìmwècìmwè aci, pa nàнку katwèna ne pàà kubingila nànsha.

Tùsambilàayi.

<sup>171</sup> Taatù wa mu Dyulu, bu mutùdì banyùngulukila kùdì ditutu dinènè nùнку dyà bantèmù, tùteekèku ku luseke díyì dyònsò, kantu kònsò, bubì bwònsò, díyì dibì dyònsò, díyì dyònsò dyakula bibi, dyeji dyònsò, “ne tùnyeemèku ne lutùùlù lubilu lùdì lutèèka kumpàlà kwètù, batàngìle mubangi ne mujikiji wa diitabuuja dyètù, Mukalenge Yesù Kilistò.” Éyì Dínà Dyèndè didì kadiyi kufwànyikijangana naadì ne ditàmbe cijila adi dìbeneshiibwè! Mùshindù mwìnè wàkalwàYe pa buloba bwà kupikula muntu uvwa mudishinde, ne kumwaluja mu bwobùmwe bwà Mukalenge Nzambì. Nènku tudi tuKwela twasàkidila bwà cyòci eci. Ne mpindyewu ku ngàsà Wendè... Kì ntwètù bààkaMusungulàku kacya to, kàdi Yéyè ngwàkatùsungula. Wàkamba ne: “Nwènù kì mbàdi baNsungùle to, kàdi Mèmè ngudi munùsungùle.” Dìbà kaayi? “Kumpàlà kwà difùkà dyà dyulu ne buloba.”

<sup>172</sup> Nènku, Nzambì munanga, kòkò muntu musòmbe kaaba aka mu dindà emu, pàmwàpa ukàadì mulàadikijèlàadikije

bwalu ebu kùkaadi bidimu ne bidimu, kàdi ku musangu ne ku musangu nyawù kùdi ànu kaadikookola kakesè ku mwoyi wèndè. Pàmwàpa muyè kashààla wa mu èkèleeziyà, ùdyàm̀bidila ne: “Èè, s’nebiikalè ànu bîmpè.” Taatù, bushùwà, Mifùndu nyeyi yácyùmvwiji mu dindà emu: kwèna mwà kusokomena paanyimà pàà èkèleeziyà kampànda, kàdi kwikala mwakàne to; anyi kwèna mwà kwikala mwîmpè, kubènga kushima ne kwiba ne kwenza cintu kanà cyònsò cyà cibì eci, kàdi kushààla ànu mwakàne to.

<sup>173</sup> Kùdi bwakàne ànu bùm̀wèpelè butùdi naabù, kabùyi bwètù twètù biinè to, kàdi bwakàne Bwèndè Yèyè. Yèyè ngudi mupwàngàje lupàndù lwètù. Ki bwà cinyi, biikàle munda Mwèndè, Nzambi kèna ùm̀ona bilèmà byètù to. Patùdi twenza cintu kampànda cyà cibì, kùdi Nyumà munda mwètù, wèla lubilà ne: “Èyi Taatù, mfwilèku luse!” Dìbà adi Nzambi kèna ùcìm̀ona to. Nè bìdi ne, tudi babwejiibwe mu bwobùm̀wè Nèndè pàm̀wè ne ngàsà. Enzàku nàнку, Mukalenge, patùkaadi tujikija òsangisha edi apa, mu Dìnà dyà Kilistò. Amen.

<sup>174</sup> Katanci kakesè cyanàànà, ndi muswè nnùlòmbèku. Cyùdi wenza nànsha ciikàle cinyi, udi mujimine. Tèelejàayi eci. Kùkaadi cikondo kampànda...Ndi mufwànyine kwikala nkàadi mucyàmbè kumpàla. Kaadilabula kakesè kàdi kangenzèkèle nkòkò aka.

<sup>175</sup> Mvwa ku—ku Toledo, mu Ohio. Mvwa nsanganyibwa mu ditàbuluja kampànda ne—ne ngenza masangisha kuntwaku ne bantu bungi cyanàànà. Kumanyabò nzùbù yà bilààla-beenyi kùmvwà nsanganyibwa; ki kubwelabò naanyì mu musòkò. Mvwa musòmbèle muntwamu, mu kaacilààla-beenyi kakesè kàà bàlaminamù ne tùshinyi.

<sup>176</sup> Tuvwa tudìila ku nzùbu mukèsè wa didìila wa Dunkard. Ùvwa mwaba mulenga wà dikèma, nsongàakàji yà bitende muntwamu, biikàle ànu ne mmwènekèlu wa beena Kilistò ne bansantu ne mwàbò mwònsò, ne mankendà ne musàngèelu wà dikèma. Dyàlumingu kulwadi, nzala kunsùmayi. Mvwa mufùme ku dyenzakù ndambù kujila kwà byàkudyà. Nènku mvwa muswè kuya dinsambù dyà mùsèèsù mu mukwàbò nzùbu wa didìila, kulòmbesha cyàkudyà ndambù. Njila mukèsè mwaba awu lwà mu disangu, ne mùvwa mwaba ànu mukèsè wètù ewu, wà ciibidilu, wà beena Àmèrikè’s, bwà kudìilamù. Kakesè, bàvwa ne kaaba kakesè, cinwinù cyà káfè, cyà bàkàngula bufùku bujimà. Ndi mwenzè ànu mbwelamù mu dyàlumingu amu, lwà pa dîbà ìbìdi jaajaaja mu mapingaja, kumpàlà kwà mèmè kuya kayiisha mu mapingaja amu, mèmè kwenza bu mukapìike, ki kupanga cyà dyenza’s.

<sup>177</sup> Mèmè kubwela, ne cintu cyà kumpàla cingàakamònà cìvwa nnsongàakàji wa citende wa bidimu biipacila ku dikùmi ne bisambòmbò, anyi dikùmi ne mwandamukùlù, munanga wa papa kampànda, munanga wa maman kampànda, mwimànyine

lwà paanyimà apu ne nsongààlùmè, nsongààkàjì awu ne byanza mudikwàte mu cifùka. Musùmbà wà bansongà basòmbèle ku—ku mèèsà a cisùmbishidi aku.

178 Mémè kuumvwa mwadi wà mashingini a binjànjà byà mfrangà. Ntàngila lwà *apa*, nyawù pàvwà mpùlushi mwimàne mwab'awu ne dibòkò dyela mukàjì kunshìngù, mumujìngiledi lwà kuulu eku, lwà mu cifùka, ne mwikàle ùnàya ku mashingini a binjànjà byà mfrangà awu. Mpindyewu, s'nudi bamanyè ne manàyi a mfrangà ne mashingini a binjànjà byà mfrangà kí mbyanyishii bwe mu Ohio to, nwènu beena Buckeye aba. Ne nudi bamanyè ne kí mbyanyishii bwe to. Kàdi ki mulombodi nyèyè ewù, ùnàya ku mashingini a binjànjà byà mfrangà; mwìnè awu muntu wa bukòlè bwànyì ebu, pàmwàpa musèlàngàne, ne musùmbà wà bânà, pàmwàpa kaakù mujimà. Mpùlushi, mukòntononyi wa mu njila, ùnàya ku mashingini a binjànjà byà mfrangà. Kùvwa nsongà awu . . . Cidi nsongà mwenzè ncinyi? Eci ncyenzè cinyi?

179 Mémè kwimana mwab'awu. Muntu kàakammòna pàngàakabwelàmu apu to, bàvwa ne byà dyenza bipitèpìte búngì, cyàbibìdi cyà kùdìbo bakwàcìke maalà. Pa nànkù, mémè kutàngila. Mémè kuumvwa muntu wàmba ne: “Èè, nudikù nwela meeji ne mvùla neànyangè mucì wà rhubarbe anyi?” Ki nkèzakana lwà apa, ki inàbànzà kampànda udi musòmbepù ewu, inàbànzà mukòlè, menemene . . . Ûvwa ne bidimu makùmi àsambòmbò ne bitaanu, anyi makùmi mwandamutekète, bìipacila byòbì abi. Ki inàbànzà mukwàte ne byà luse awu . . . Ncyèna ndyula muntu bwà yèyè ùkèba kumwènèka mutàmbe bulenga to. Kàdi pàvwàye . . . Ûvwa mudyàkàje, muvwijè nsùkì milwè yà bleu, yimwèka anu yà bleu menemene. Ne yònsò mikòsa, lwà kumutù eku, ne muyìvwijè ànu yà bleu menemene. Ne ùvwa mwenzè didilengeja dyà byanza dyà menemene, anyi cinùtù nubìikila bintu bilaaba kwìsù aci, ne matobà manène. Ne ùvwa muvwàle kàpùtulù kakesè menemene, ne mukwàcikwètù awu ùvwa ne minyèngù mu mùshindù wà ne minyìinyi, mafùtá, minyìinyi yìkaavwa mimuzelèle mùshindù ewu ku mikòlò. Ûvwa mukwàcìke maalà. Ûvwa musòmbè mwab'awu ne muntu mulùme mukòlè, ne ciinè aci mu muvù wà luuyà lukòlè, muvwàle cimwè cyà ku biinkooci byà kale, byà bikùnzùbile byà bàsàlaayi ebi, anyi byà diikala dyà lubìshibishi. Cilembèlèle mùshindù ewu, mwikàle ne citàmbalà cyà mu nshìngù cinène cidìjìngila mu nshìngù. Bakwàcìke, bàvwa bàbìdì, ne biikàle ne mukàjì mukòlè mukwàte ne byà luse ewu.

180 Mémè kwimana mwab'awu nkènzakana. Mémè kwamba ne: “Nzambì, Udi mwà kutwàla biinè ebi munyì's? Ncinyi—ncinyi . . . Udi utàngila bintu byà mùshindù wàwa munyì's? Pàdìbi ne, mémè, ngènzàmpèkààtù musùngila ku ngàsà ewu, nyawù bimfikisha ku dyela meeji awu, Wèwè udikù mwà—mwà kubitàngila munyì's? Mòna's, s'bidi bimwèka ànu bu ne Udi mufwànyine kutaayisha cintàkanyì eci. Rebekah wanyi

mutekète wàwa ne Sarah ne bikengelè kukoleshiibwabò mu bwenzeji bwà mûshindù wàwa anyi? Nebikengelè bwà bânà bàànyì bakesè bàà bakàjì abu kukungamanganabò ne buloba bwà—bwà bantu bàà luumù, bamanyike bikolè mùdibu leelù ewu ebu, mùdì bantu bènza maalu nàka wàwa anyi? Nzambi, mmunyi mùndiku mèmè mwà . . . ndi mwà kwenzakù cinyi's?"

Mu bushùwà bwà bwalu, cintu nngàsà Wendè. Pìkalàbi ne mbalongolwela Mwoyi wà Cyendèlèlè, nebàkakufikè. Kabiya nàнку to, kabààkakufika to. Ncyèna mumanyè. Aci nciàngile Nzambi. Mèmè nêngènzè wànyì mudimu.

<sup>181</sup> Mèmè kudyàmbidila ne: "Udikù mwà kutwàla biinè ebi munyi's, Nzambi? S'mbimwèke ne Wèwè udi wa cijila mu mùshindù wà Ukùpula ànu cintàkanyì cyàcya pa buloba." Mèmè ne: "Anji tàngilà ànu kaakù mukàjì mukùlàkàjì udi musòmbe pààpa wàwa. Tàngilà nsongààkàjì wa citende udi mundekeelu mwàmwa wàwa. Kàbidì mukàjì nyéyè ewu mwimàne kaaba aka, mwikàle pàmwàpa ne bidimu makùmi àbidì ne bitaanu. Ne mpùlushì wàwa mumujìngile mabòkò mu cifùkà, ùnàya ku màshinyì a binjànjà byà mfrangà. Kàdi's mmulombodi wàwa; ditùngà's ndimanè kufwà. S'ki buumaamù bùkaadi bumanè kufwà bwàbwa. S'ki mukùlù ukàadi muyè ewu. S'ki nsongààkàjì wa citende udi musòmbe kwàka wàwa, bwèndè's bùkaadi butùuke. Tàngilà nsongààlùmè, pàvwàbi bikèngela kwikalayì mu èkèleeziyà anyì mu mwaba kampànda's."

<sup>182</sup> Mèmè ne: "Èyì Nzambi, ndi mwà kwenzakù cinyi's? S'ki mèmè ewu mu cimenga eci, ngeela mbilà ne mwoyi wànyì wònsò, kàdi bóbò kabàyi bàbitàngilakù to bùumuka bàya byenzè bu ne bàvwà . . ." Mèmè kudyàmbidila ne: "Èè, Nzambi?"

<sup>183</sup> Èè, díbà adi meeji kumvwilawù ne: "Mèmè nciyi mubàbìikile to, mmunyi mwàlwàbo? Bònsò bàdì Taatù muMpèeshe nebàlwe. 'Nudi ne mèsù kàdi kanùyì mwà kumòna to, ne maci kàdi kanùyì mwà kuumvwa to."

<sup>184</sup> Mèmè kudyàmbidila ne: "Èè, bu Mfùmù wa ditùnga mwà kulwa pamùtù pàà ditàbuluja, bantu bònsò's mbafwànyine kupàtuka. Kaa, bushùwà's, aci's ncyà maalu a pa buloba's."

<sup>185</sup> Díbà adi mèmè kudítwa mu dyela meeji ne: "Èè, Nzambi, mmunyi, bwà cinyì Kùyikù ànu uya, ulwa, utùma Yesù ne wènzakù bwà tubijikijilamù? Kùyiku ànu—ànu uya kabijikija byònsò, ne kubilekela bìya?"

<sup>186</sup> Pashiishe mèmè kumòna cintu kampànda cinyungakana kumpàlà kwànyì. Cìvwa cimwèka bu mvùnda mukèsè ùnyùnguluka mùshindù ewu. Mèmè kutùngunuka ne kucitàngila. Mèmè kumòna buloba bùnyùnguluka bùnyùnguluka. Mèmè kubùtàngila, mwaba wùvwàbu bùmyamina cintu kampànda. Mèmè kutàngila, ne cìvwa ndimyamina dyà Mashi makùnze, makùnze kùnzùù, eku ne eku, mu nyùngulukilu wa buloba; byenzè ànu bu mvùnda

ùnyùnguluka, byenzè bu mùtootò wà mulanjilanji, ne mwikàle ne mvùnda mumunyùngùlùkìle mùshindù *ewu*. Ki mèmè kutàngila mwinè mvùnda *ewu*. Ne kumutù kwèndè menemene aku, mèmè kumòna Yesù mu cikèèna-kumòna. Ùvwa mutàngile panshì. Ki mèmè kudimòna mwimàne panshì pa buloba apa, ngenza bintu bìvwà kabìyi bikèngela bwà mèmè kwenza to. Kàdi musangu wònsò wùmvwà ngenza mpèkaatù, Nzambi ùvwe mufwànyine kwikala munshebèye: “Bwalu, ditùkù diwàcidya, ki ditùkù diwàfwà.” Ne ki civwà cijila ne bwakàne bwa Nzambi bìlòmba, ne bìvwà bikèngela bwà wikalè mufwè. Ki dîbà adi mèmè kutàngilakù. Mvwa mutùngùnùke ne kudikùpula kwìsù. Mèmè kwamba ne: “Ncyèna . . . Ncyènakù muyè mu tulù to. Ndi . . . Ncìkèèna-kumòna. Ndi mutwishìibwe ne eci ncìkèèna-kumòna.”

<sup>187</sup> Mèmè kutùngunuka ne kutàngila, pàmvwà mwimàne paanyimà pàà ciibi apu. Ki mèmè kumòna yànyì mpèkaatù sungasunga yìbànda. Ne musangu wònsò wùvwàyi ànu ne yitùutè ku Nkwasa wa butùmbi, Mashì Èndè àvwa ènza bu cikàndiki ku kàshinyi. Àvwa àyìkwàta, ne mvwa ngÀmòna ànyùkuka, ne Mashì àvwa àMupwekela kwìsù. Nènkù mèmè kuMumòna wèla byanza Byèndè muulu, wàmba ne: “Taatù, mufwilèku luse, kì mmumanyè cidìye wènza aci to.”

<sup>188</sup> Mèmè kudimòna ngenza cikwàbò cintu, kuMunyùkushaci kàbìdì, cikàndiki's. Nùnkù cyòcì, nùnkù Nzambi mmunshebèye dyàkàmwè, kàdi Mashì Èndè àvwa mankwàte. Àvwa imanyika mpèkaatù yànyì. Mèmè kudyàmbedila ne: “Éyi Nzambi, mmèmè udi mwenzè aci awu anyi? Ncyà bushùwà ne kàvwa mmèmè to.” Kàdi ùvwa mmèmè.

<sup>189</sup> Pashiishe mèmè kuya ngenda ngenda mùshindù *ewu*, byenzè bu ne mvwa nkòsolwela mu cibambalu amu, ne mèmè kuya too ne pabwìpi Nendè. Mèmè kumòna mukànda mutèèka mwab'awu, pàvwa pafùnda dìnà dyànyì, ne màleeta mafiike a mishindù yònsò mafùndapù. Mèmè kwamba ne: “Mukalenge, ndi nyingalala bwà mùndì mwenzè cyòcì eci. Mpèkaatu yànyì nyìdì miKwenzèje aci anyi? Mèmè ngudi munyùngùlùje Mashì Èbè buloba bujimà wàwa anyi? Mèmè ngudi—mèmè ngudi muKwenzè eci anyi, Mukalenge? Ndi nyingalala be bwa dicyènza.” Ki kwololaYè cyanza. Mèmè kwamba ne: “Udikù mwà kumfwila luse anyi? Ncivwa ne meeji a kucyènza to. Nèngiikalè . . . Wèwè, ku ngàsà Webè, nènditàcishèku bwà kwikala mwànà wa balùme mutàmbe bwìmpè Wèwè ànu munkwàcishe.”

<sup>190</sup> KwangataYè cyanza Cyèndè ne kutuutaYè tuumapi mu luseke Lwèndè, kwangataYè munu Wèndè e kufùndaYè ne “mufwidìibwe luse” pa mukànda wànyì apu; kuwìmanshaYè paanyimà Pèndè apu, mu Mbù wa cipwàmwòyi. Mèmè kushàala mucitàngile ndambù. Ki kwambaYè ne: “Mpindyewu, Mèmè ndi nkufwila wèwè luse, kàdi wèwè udi muswè kupiisha mukàji

wàwa.” Nwamònu anyì? Yèyè ne: “Wèwè wafwìdiibu luse, kàdi udi wamba bìshi bwèndè yèyè? Udi muswè kumubùtula. Kùvwà muswè bwà yèyè ìkalè ne mwoyi to.”

<sup>191</sup> Mémè kudyàmbidila ne: “Éyì Nzambì, mfwìlèku luse. Ncìvwà muswè bwà kwela meeji awu to. Ncìvwà muswè kwenza nànkù to. Ncì—ncì—ncìvwà muswè kwenza nànkù to.”

<sup>192</sup> “Wafwìdiibu luse. Udi wèwè udyùmvwà bímpè. Kàdi bìshi bwèndè yèyè? S’ncìdiye ùjinga pèndè. S’ncìdiye ùjinga.”

<sup>193</sup> “Èè,” mûngààkadyàmbidilà, “Nzambì, nêmmányè munyì ne kampànda ng’Ùdì mubiikile, ne kansanga ng’Ùdì kùyì mubiikile?” Wànyì mudimu ngwà kwakula ne bantu bònsò.

<sup>194</sup> Nènku, pàakanguumukà cikèèná—kumòna aci, mémè kuya tàmàkàtàmàkà too ne kùdì mukàjì awu. Mémè kwamba ne: “Wetwàwu, inàbànzà!” Ne bantu balùme bàbidì abu bàvwà bayè ku nkumba. Ki bôbò . . . Mukàjì awu ùvwà musòmbe mwab’awu, ùtuuta cinshìkunshìku, nudi bamanyè’s, ùseka. Mùlàngì wà wiskì mutèeka pa mèèsà, ànyì wà byèrè, èyowà, maalà a kapyà matèèka mwab’awu, wùvwàbò bànwìna awu. Mémè kuya kùdìye. Mémè kwamba ne: “Wetwàwu!”

Ki yèyè ne: “Kaa, wetwàwu.”

Ki mémè ne: “Ndikù mwà kusòmbela panshì anyì?”

Yèyè ne: “Kaa, s’nyewù ndi ne mukwàbò mulùme.”

Mémè ne: “Kí ncìmvwà ngamba to, mwanèètù wa bakàjì.”

Kuntàngilayè pàngààmubiikidi ne “mwanèètù wa bakàjì” apu. Yèyè ne: “Udi ukèba cinyì?”

Mémè ne: “Ndikù mwà kusòmbela panshì bwà katanci kakesè cyanààná anyì?”

Yèyè ne: “Mùdì muswè.” Ki mémè kusòmba.

Mémè kumulondela cìvwà cyenzèke aci. Kwambayè ne: “Dyèbè nganyì?”

Ki mémè ne: “Branham.”

Yèyè ne: “Wèwè ki muntu udi mu cipalu cyà ndundu emu awu anyì?”

Mémè ne: “Eyowa’s, màndamù.”

<sup>195</sup> Yèyè ne: “S’mvwà ne mwoyi wà kulwa kuntwaku.” Yèyè ne: “Mukalenge Branham, mémè ewu’s ntu mukolèshìibwe mu dikù dyà beena Kilistò.” Yèyè ne: “Ndi ne nsongààkàjì yìbidì yà bitende biikàlè beena Kilistò. Kàdi maalu kampàndà, kampàndà ngàdì menzèke,” ki kulondayè njila mubi, anyì mubangè kulonda.

<sup>196</sup> Mémè ne: “Kàdi, mwanèètù wa bakàjì, kî mbwalu to, Mashi àcìdì ànu makunyùngùlùkile. Buloba ebu mbubwikila kùdì Mashi.” Bu Ówò kaàyi mabùbwikile to, nùnkù Nzambi mmutùshebèye, twètù bònsò. Yèyè . . . Pùùmushìibwà Mashi

awu, ùdimukè bwà cilumbulwidi. Kàdi mpindyewu, wèwè mufwè kùyi ne Mashì awu to, wèwè muyè dyàmwàmwà dyà mwaba awu, díbà adi kakwèna cyàkwakwilà to nànsha címwè. Leelù ewu Mashì àdi ènza mudimu pa kaaba kèèbè. Mémè kwamba ne: “Inàbànzà, cyà bushùwà, Mashì ngàcìdì ànu makubwikile. Paùcìdì ànu ne mweyelu mu mubidi wèbè amu, Mashì ngàdì makubwikile. Kàdi dǐngà ditùku pùùmukà mweyelu pànwapa, musùùkà wùpàtuka, neùye dyàmwàmwà dyà Mashì awu, ne kakwèna cintu nànsha címwè to ànu cilumbulwidi. Paùcìdìku ne mpùngà wa difwidiibwa dyà luse apa. . .” Ki mémè kumukwàta ku cyanza.

197 Ùvwa ùdila mwadi, kwambayè ne: “Mukalenge Branham, ndi nnwà maalà’s.”

198 Mémè kwamba ne: “Aci kacyèna cyènza bwalu to. *Cintu kampànda* ncìdì cindimwije bwà kulwa kukwambila.” Mémè ne: “Nzambi, kumpàlà kwà difùkà dyà dyulu ne buloba, ùkaavwa mukubiikile, mwanèètù wa bakàji. Kàdi udi wenza bibì, ne udi ànu utàmba kucibìipisha.”

199 Yèyè ne: “Udi wela meeji ne mMufwànyine kungaakidila anyì?”

200 Mémè ne: “Kakùyi mpatà to, mMufwànyine kukwakidila.”

201 Mwaba awu mutwè binù, twètù kutwà binù munkaci mwà cibambalu aci, kàdi kwenza disangisha dyà milòmbò dyà cyena-kale adi. Mpùlushì awu kutùulayè cifulu ne kutwàye cinù címwèpelè panshì. Mwaba awu twètù kwenza disangisha dyà milòmbò, mu mwaba awu. Bwà cinyì? Nzambi mmudishikàmìne.

“Tùteekàayi ku luseke midimu mifwè eyi, tùyaayi kumpàla too ne ku bupwàngàne.”

202 Tùbwelàayi mu cipaapu aci mùdì byòbì ebi byà ne: “Ndi wa mu èkèleeziyà; ndi wa mu *cikampànda*” abi, byònsò abi mbijikè. Nènkù tùyaayi too ne ku bupwàngàne.

203 Mulundà wanyi ngènzàmpèkààtù, pawikalà kùyi Mashì awu leelù ewu, kùyi lupàndù, kùyi ngàsà to, Mashì a Yesù Kilistò àdi àkulama. Wèwè udi wamba ne: “Èè, ndi mwenzè abi cikondo cyònsò eci kakùyi bwalu bungenzèkèle to.” Kàdi dǐngà ditùku neùye mwaba wùdì cintu nànsha címwè kaciyikù mwà kukwakwila to díbà adi.

Tùsambilààyaaku mpindyewu, patùdì twinyika mitù yètù apa.

204 Kùdikù, nkufwànyìnekù kwikala muntu kaaba aka leelù ewu, udi muswè kwamba ne: “Nzambi ikàlèku naanyì luse, nyewù ngààmányì ne ndi mwenzè bibì” anyì? Pàmwàpa utu mukashàale wa mu èkèleeziyà kampànda. Bìdì ànu bìmpè. Kàdi pawikalà kùyi mupetè ngàsà wa Kilistò to, udikù mwà kwela cyanza muulu, wamba ne: “Nsambidilèku, mémè, Mwanèètù

Branham” anyi? Nzambi àkubènèshè, mukalenge. Nzambi àkubènèshè, inábànzà. Ncyà bushùwà. Kwikadi... Nzambi àkubènèshè, mukalenge, paanyimà pààpa. Nzambi àkubènèshè, ne wèwè. Pàànyimà menemene mundekeelu mwàmwà, èyowà, Nzambi àkubènèshè. Elà cyaanza muulu. Ncyà bushùwà. Elà ànu cyaanza muulu cyaanàà, wamba ne: “Nzambi, ikàlàku naanyi luse.”

205 Wèwè udi wamba ne: “Ndi wa ku èkèleeziyà, Mwanèètù Branham. Èyowà, ndi—ndi muteetè bwà kwikala mwìmpè, kàdi ncyèna mumanyè to, mbimwènèke ànu ne ndi, mùdibi bìmwèka’s, ne ncyèna mwà kucyènza to.” Kaa, mwenyi mukwàte ne byà luse, mulundà mupuuyile mukwàte ne byà luse, ncyà bushùwà ne kacayà kùtukù mwanjì kumòna cìkèenà-kumòna aci to.

206 Wèwè udi wamba ne: “Mwanèètù Branham, nkàadi mwele mbilà. Nkàadi mwakùle mu myakulu. Nkàadi mwenzè byònsò ebi.” Abi mbifwànyine kàbìdi kwikala bilelèlà. Abi mbìmpè, ncyèna ne bwalu bubì bwà kwamba bwà aci to.

Kàdi, mulundà wanyì munanga, mujìmine, kàdi, bwà kwakula mu myakulu, anyì bwà kuzakala, anyì bwà kulabulangana ku cyaanza, anyì bwà kubàtiijiibwa, abi, abi’s mbilenga. Kàdi, kuMumanya Yèyè, nkumanya Mupersona. “KuMumanya Yèyè ki Mwoyi.”

207 Wèwè udi wamba ne: “Ndi mumanyè Bible, bìmpè menemene.” Èè, kumanya Bible, kí m’Mwoyi to. “KuMumanya Yèyè,” mupinganyi muleeji muntu, “kuMumanya Yèyè, Kilistò,” ki wèwè kumanya ne Yèyè wàkufwìdi luse.

Nudikù mwà kwela cyàkàbìdi byanza muulu anyì, muntu kampànda mukwàbò? Nzambi àkubènèshè, inábànzà. Nzambi àkubènèshè, mukalenge. Nzambi àkubènèshè apa nùнку, mwanèètù wa balùme. Nzambi àkubènèshè paanyimà pààpa, nsongààlùmè. Nzambi àkubènèshè apa nùнку, mwanèètù wa bakàjì. Nzambi àkubènèshè, paanyimà menemene lwà mundekeelu, mwàmwa. Ncyà bushùwà. “KuMumanya Yèyè, ki Mwoyi.”

“Mwanèètù Branham, wamvùlukakù. Ndi mpindyewu, mu nkwasà wanyì emu mene, nèngiitabè Kilistò.”

208 Ambà ne: “Bwelà mu mwoyi wànyì, Mukalenge Yesù, ne mpèèshèku ditalala adi, kalolo aku.” Kuya mu èkèleeziyà, kwimba mìjiki ne mwèbè mwònsò, kuja maja ubànda upweka, unyeemakana mu kajila; walukila kumbèlu, utàcisha meeji, ne utànkakana, ne ukòkangana, aci kí n’Kilistò nànsha. Udi uya mu èkèleeziyà, usòmba utèèleja kaadiyiisha kakesè kàà mwìkalà cilamba mwà kulaabiibwa mùkubù, anyì *cintu kampànda* cyà mùshindu awu, kùyikù umvwa Díyì to. Díyì ndidì ditwàla Mwoyi. Dyòdi ki Dimiinu. Kwèna muswè ditalala anyi?



209 Udi mutàcishùbwe pa bidì bitàngilà lufù anyi? Udi mufwànyine kupeta disaamà dyà mwoyi leelù ewu, cidi cikutàcisha mu meeji anyi? Anyi udikù mwà kucyònkomoka, bwà kwamba ne: “Nènkiikàlè ne Mukalenge Yesù ku ndekeelu kwà njila ewu”? Udi muMumanyè anyi? Wèwè kùyi muMumanyè to, elà ànu cyanza muulu cyanàànà. Netùlombè disambila bwèbè wèwè. Èyowà’s, mwanèètù, wèwè pèèbè.

210 Èyo, munda mwà mwoyi wèbè mpindyewu.

Ànu mûndì emu, ncìyi ne cya kudìlumbulwila naaci to,

Ànu Mashi Èbè àkeediibwa panshi (bwà nganyi?) bwànyì mèmè awu,

Bwalu ndi ndaya, ndi ngiitabuuja,

Éyi Mwânà wa mùkòòkò, Éyi Mwânà wa mùkòòkò wà Nzambi, ndwàlwa. Ndwàlwa, ne dinanga, ne luse.

Ànu mûndì . . .

Asà ànu lwendu mutàngìle buludì kùdìYe, ku diitabuuja. Itàbùùjà ne Yèyè mmwimàne mwaba awu mene ku luseke lwèbè aku. Yèyè mmwimànekù.

. . . -ndìle to

Bwà kuumusha musùukà (ku búngì munyi mpindyewu?) ku umwe. . . (ciiji, budimù),

Kùdì Ewu Mwena Mashi àdì mwà kusukula dikeji ne dikeji dyònsò,

Éyi Mwânà wa mùkòòkò . . .

211 “Ku diitabuuja nênye mutàngìle ku nkùrusè, mu dindà emu. Ndi ntèeka majitu àànyì panshi. Ndi ndwa.” Nzambi àkubènèshè paanyimà pààpa. Abi mbìmpè. [Mwanèètù Branham ùdi ùbanga kwimbila mu matàma *Ànu Mûndì Emu*—Muf.] Mpindyewu kanwikadi kanùyi nucyùka myandà to. Ne luuyà lwònsò, ne kalolo kònsò, asà lwendu ùye buludì mutàngìle ku nkùrusè.

212 Mu Dipungila Dikùlukulu, bàvwa bàlwa ne mwânà wa mùkòòkò. Bàvwa bamanyè ne bàvwa benzè mpèkaatù, bàvwa bacìmanyine ku mikenji. Wèwè wacìmanyi mpindyewu, bwalu Nzambi wákùlù ne mwoyi wèbè. Bàvwa bàtapa disù ku mikenji ne: “Kwèndi masandi. Kwènji *cikampànda*.” Nènku bàvwa bàngata mwânà wa mùkòòkò, bàya bàkatenteka byanza pa mwânà wa mùkòòkò awu, mwakwidi ùkòsa muminu. Nyama mukèsè awu ùvwa ùsuba mikòlò, ne ùzànyika mashi, ne ùdila bee bee, ne ùfwa. Byanza byèndè bìvwa bitampàkàne byònsò ne mashi. Mwânà wa mùkòòkò awu ùvwa ùfwa pa kaaba kèndè, kàdi yèyè ùvwa ùpàtuka ne dijinga dìmwèdìmwè adi bwà kucyènza cyàkàbidì.

213 Kàdi mwaba ewu, tudi tulwa ku diitabuuja, ku ngàsà. Nzambi ngudi mutùbùikile. Tudi tutenteka byanza byètù pa mutù wà Mwânà wa mùkòòkò wà Nzambi. Tudi tuumvwa

nsandu awu mùdiye ùdila. Tudi tuumvwa Dìyì adi ne: “Ndi ne nyòòtà; mpèèshaayi màyi a kunwà. Taatù, kùbòmèkèdì bujitu bwà mpèkaatù ewu to; kí mbamanyè cìdibo bènza aci to.” Nwamònu anyi? Ku diitabuuja, tudi tuumvwa lufù lùdiYe mufwè pa kaaba kèètù alu. Munda mwà mwoyi wètù mwàmwa mùdi mùlwa ditalala dyà ndòndò, dishìndàme, pàdì Dìyì dyàmba ne: “Wafwidiibu luse mpindyewu. Ndààku kùyi kenza mpèkaatù kàbìdì to.” Mùdìbi ne, ku ngàsà, dìbà adi, tudi twasa lwendu tuumuka katùyi ne dijinga òmwèdìmwè adi to, kàdì ne dijinga dyà kubènga kwenzakù kàbìdì mpèkaatù anyi kwenza cintu kampànda cyà cibì. Ditalala didì dípita cyumvwidi cyònsò, dyàbwèdì mu mwoyi wètù.

Swàyi nuCìpetèku mpindyewu patùdì tusambila apa, twètù bònsò, pàmwè.

<sup>214</sup> Taatù wa mu Dyulu, nyawù bàlwa ku diitabuuja, ku ngàsà. Kùdì byanza bitwè ku dikùmi ne bìbìdì byela muulu. Mmamuma a Mukenji awu. Bàdì bàlwa Kùdì. Mbiitàbùùje. Mèmè ndi pàanyì mubitàbùùje, Mukalenge. Ndi ngiitabuuja, cyà bushùwà ne, Nyumà Mwimpè mmwakùle naabò. Ne ku diitabuuja bòbò bàdì bènda bàbàndila buludi ku cibàndilu cya Yakòbò mpindyewu, buludì too ne kwìnshì kwà nkùrusè, bàkatèèkakù mpèkaatù yàbò yònsò, bàmba ne: “Mukalenge, byàmpici. Ncyènà ànu mwà kutùngunuka kàbìdì ne kuyàmbula to. Nènku Udikù mwà kuswà bwà kuumusha bujitu bwànyì bwà mpèkaatù ebu, ne kuumushakù mu mwoyi wànyì dijinga dyà kwenza nànkù anyi? Nènku, ku diitabuuja, leelù ewu, enzàku bwà nKwakidilè bu Musùngidi wanyì sungasunga. Ne kubàngila ku leelù, nènKulondè mu kilòmèètà ne kilòmètà yònsò wa njila, too ne ku ndekeulung kwà lwendu. Ndi mmòna cidì ‘kuya kumpàla too ne ku pupwàngàne’ kùumvwija, kí nkubwela mu èkèleeziyà, ne miji yà midimu mifwè bu mùdì mabàtiiza ne bikwàbò to. Kàdì ndi muswè kuya kumpàla, too ne pàngùikalà ncìciyi mwà kwikalakù kàbìdì to, bwà Kilistò wàmòna mwà kwikala ne mwoyi munda mwànyì.”

<sup>215</sup> Éyì Yesù, pèèshakù musùukà wònsò wùdì ne kanyinganyinga cyòcì eci, mu dindà emu. Bònsò bèdì cyanza muulu abu nebàpetè Mwoyi wà Cyendèlèlèlè bwalu Wèwè ngudi mucilayè. Bènji diitaba dyà bantù bitwilàngàne. Mbeelè byanza byàbò muulu. Mbashipè mikenji yònsò yà dikòkiibwa dya kùdì buloba. Báfikishì maalu a mamanya ku didyùmvwa bundù, bwalu maalu a mamanya àdì àmba ne: “Mabòkò èbè àdì ne cyà kwikala ànu malembèlèlè.” Cintu kànà cyònsò ncifwànyine kujaadika aci mu maalu a mamanya ne, cidì ne cyà kulamiibwa ànu pa buloba, bwalu dikòkiibwa dyà kùdì buloba didì dicitamina ànu pa buloba. Kàdì kùvwa nyumà kampànda munda mwàbò udi mwangàte dipàngadika, nènku bèdì mikenji yà dikòkiibwa dyà kùdì buloba kadyòmbò ne bèdì byanza byàbò muulu. Wèwè wacimònu, Mukalenge. Udi mufunde mènà

àbò mu Mukàndà. “Mufwidiibwe luse.” Mukàndà wà kale wùkaadi mwela paanyimà mu Mbú wa Cipwàmwòyi patùdì twakulangana apa, kawùciyikù mwà kuvùlukiibwa kàbidì to kashidi. Bàyekù kumpàla leelù ewu, bu beena Kilstò bàà dinanga, bàà kalolo, bwà kuKukwàcila mudimu. Ne pàmwàpa bààbùngì bàvwà kabàyi beelè byanza muulu abu, ùbàpèèshèku pààbò.

<sup>216</sup> Bansantu bàseemenèku ànu pabwìpì ndambù, Mukalenge, bwalu tukàadi baseemène ntàntà wa ditùku òmwè pabwìpì ne Kumbèlu kutàmba mutùvwà makèèlèlè. Ikàlàku neetù, Mukalenge, bwalu tudi tulòmba nùнку mu Dìnà dyà Kilstò ne bwà butùmbì Bwèndè. Amen.



*EBÈLÙ, NSHAPÌTÀ MWITÂNÙ NÈ MWISAMBÒMBÒ 1* LUA57-0908M  
(Hebrews, Chapter Five and Six 1)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dindà, mu matùkù 8 a ngondo wa citèemà, cidimu cyà 1957, ku Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)